

漢書門類		四七二	三六	四三	六九
類		號	函	架	冊

內閣文庫		漢書	四七二	三六	六九
類		號	函	架	冊

內閣文庫		漢	4912
冊數	69	(	37)
函號	362		69

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





文翰類選大成卷第八十八歌目錄

宋

王元之一首

范希文一首

歐陽永叔一首

蘇子美一首

王琪一首

李至一首

司馬君實一首

邢敦夫一首

劉貢父一首

蘇子瞻一首

陳圖南一首

張文潛三首

馬子才一首

秦少游一首

賀方回一首

朱仲晦一首

蕭真卿二首

趙宜之一首

謝君直一首

文宋瑞七首

文翰類選大成卷第八十八歌目錄



文翰類選大成卷第八十八

文翰類選大成卷第八十八  
王元之  
觀聖上親試貢士歌  
王元之  
左長史上海李相與編輯  
伴 讀慈谿馮厚校正

文翰類選大成卷第八十八

左長史上海李相與編輯

伴 讀慈谿馮厚校正


歌類

宋

觀聖上親試貢士歌

王元之

天王出震寰宇清奎星粲粲昭文明詔令郡國貢多士  
大張一網羅群英聖情孜孜終不倦日斜猶御金鑾殿  
宮柳低垂三月煙爐香飛入千人硯麻衣皎皎光如雪  
一一重瞳親鑑別孤寒得路荷君恩聚首皆言盡臣節  
小臣蹤跡本塵泥登科曾賦御前題屈指方經五六載  
如今已上青雲梯位列諫官無一語自愧將何報明主  
應制非才但淚垂強作狂歌歌舜禹





和章岷從事鬪茶歌

范希文

年年春自東南來建溪先暖冰微開溪邊竒茗冠天下  
武夷仙人從古哉新雷昨夜發何處家家嬉笑穿雲去  
露芽錯落一番榮綴玉含珠散嘉樹終朝采掇未盈簷  
唯求精粹不敢貪研膏焙乳有雅製方中圭兮圓中蟾  
北苑將期獻天子林下雄豪先鬪羨鼎磨雲外首山銅  
瓶攜江上中瀟水黃金碾畔綠塵飛碧玉甌中翠濤起  
鬪茶味兮輕醍醐鬪茶香兮薄蘭芷其間品第胡能欺  
十日視而十手指勝若登仙不可攀輸同降將無窮恥  
吁嗟天產石上英論功不愧堦前奠衆人之濁我可清  
千日之醉我可醒屈原試與招魂魄劉伶却得聞雷霆  
盧仝不敢歌陸羽須作經森然萬象中焉知無茶星商  
山文人休茹芝首陽先生休采薇長安酒價減千萬成

都樂市無光輝不如仙山一罌好冷然便欲乘風飛君  
莫羨花間女郎只鬪草嬴得珠璣滿斗歸

紫石屏歌寄蘇子美

歐陽永叔

月從海底來行上天東南正當天中時下照千尺潭潭  
心無風月不動倒影射入紫石巖月光水潔石瑩淨感  
此陰魄來中潛自從月入此石中天有兩曜分為三清  
光萬古不磨滅天地至寶難藏緘天公呼雷公夜持巨  
斧隳巖墮此一片落千仞皎然寒鏡在玉奩蝦蟆白  
兔走天上空留桂影猶杉杉景山得之惜不得贈我意  
與千金兼自云每到月滿時石在暗室光出簷大哉天  
地間萬怪難悉談嗟予不度量每事思窮探欲將兩耳  
目所及而與造化爭毫纖煌煌三辰行日月尤尊嚴若  
令下與物為比去聲擾擾萬類將誰瞻不然此石竟何物



有口欲說嗟如鉗吾奇蘇子曾羅列萬象中包含不惟  
曾寬膽亦大屢出言語驚愚凡自吾得此石未見蘇子  
心懷慚不經老將先指決有手誰敢施鐫鑿呼工畫石  
持寄似幸子留意其無謙

蘇子美

蘇子美

日月行上天下照萬物根向之生榮背則死故爲萬物  
生死門東西兩交征晝夜不暫停胡爲號山石留此皎  
月痕常存桂樹散踈陰有若圖書成未叔得之不能曉  
作歌使我窮其源且疑月入此石中分此兩曜三處明  
或云蟾蜍好溪山逃遁出月不可關浮波穴石恣所樂  
常娥孤坐初不覺玉杵夜無聲無物來搗藥常娥驚推  
輪下天自尋捉遶地撇江踏山岳二物驚奔不復見留  
此玉輪之迹在青壁風雨不可剝此說亦詭異予知未

精確物有無情自相感不聞幽微與高貌老蚌吸月月  
降胎水犀望星星入角彤霞爍石變靈砂白虹貫巖生  
美璞此乃西山石又爲月照著歲久光不滅遂有團團  
月寒輝籠籠出輕霧坐對不復嗟殘缺蝦蟇從汝惡背  
吻可能食此清光沒玉川子若在見必喜不徹此雖隱  
石中時有靈光發土恠山鬼不敢近照之僵仆肝腦裂  
有如君上明下燭萬類無遁形光艷百出無虧盈

清輝殿觀唐明皇山水石字歌

王琪

皇家四葉恢聖功笑臨日燭清華戎漢終靜治洽柔教  
堯心稽古開神聰有唐英主稱好文仙毫洒落驅風雲  
壯哉山水有奇字煥乎八法存翠珉自從棄置咸陽道  
解剝煙滋委宮草天開神贊會休辰甄收再作皇居寶  
如何淪廢三百春迎逢睿鑑來紫宸奎鉤粲粲光華動



群土森森氣象新丹靈春妍瑞靄深文梁藻棟結芳林  
鴻翔鳳翥徑方丈杯流泉湧蒙親臨臣榮幸從金輿  
鈎婉魂驚拭目初多慚攬筆非清藻惟慶千齡際帝圖  
○桃花犬歌呈脩史錢侍郎李至  
宮中有犬桃花名絳繒圍頸懸金鈴先皇為愛馴且異  
指顧之間知上意珠籟未卷扇未開桃花搖尾長先至  
夜靜不離香砌眠朝飢抵傍御床餒彩雲路熟不勞牽  
瑞草風微有時吠無何軒后鑄鼎成忽遺弓劍棄寰瀛  
迢迢松關伊川上遠逐龍輔十數程兩背碑漣似垂淚  
骨見毛寒頓憔悴萬人見者倍傷心微物感恩猶若是  
韓盧備獵何足嘉西旅充庭豈為瑞聞君奏詔修實錄  
一字為褒應不曲白魚赤鴈且勿書願君書此懲浮俗

勸學歌

司馬君實

養子不教父之過訓導不嚴師之情父教師嚴兩無外  
學問無成子之罪煖衣飽食居人倫視我笑談如土塊  
攀高不及下品流稍遇賢才無與對勉後生力求誨控  
明師莫自昧一朝雲路果然登姓名亞等呼先輩室中  
若未結親姻自有佳人求匹配勉旃汝等各早脩莫待  
老來徒自悔李伯時畫圖歌人言高邢敦夫  
長安城頭烏欲栖長安道上行人稀浮雲卷盡莫天碧  
但有明月流清輝君獨騎驢向何處頭上倒著白接羅  
長吟搔首望明月不學山翁醉似泥到得城中燈火鬧  
小兒拍手攔街笑道傍觀者那得知相逢疑是商山皓  
龍眠居士畫無比搖毫弄筆長風起酒酣閉目望窮途  
紙上軒昂無乃似君不學長安遊俠誇年少臂鷹挾彈



車臺道君不能提攜長劍取靈武指揮猛士驅貔虎胡  
為脚踏梁宋塵終日飄飄無定所武陵桃源春欲暮白  
水青山起煙霧竹杖芒鞋歸去來頭巾好挂三花樹

茂陵徐生歌

劉貢父

茂陵徐生老且迂一心區區長信書拜章北闕三待報  
意欲霍氏安無虞那知世主心不同積惡未極難為功  
徒新曲突事不爾壯侯幾人當受封高岸為谷丘淵移  
魯酒之薄邯鄲圍人生快已各以時舊意望君君不思

後石鼓歌

蘇子瞻

冬十二月歲辛丑我初從政見魯叟舊聞石鼓今見之  
文字鬱律蛟龍走細觀初以指畫壯欲讀嗟如箝音在  
口韓公好古生已遲我今况又百年後強尋偏旁推點  
畫時得一二遺八九我車既攻馬亦同其魚維鱣音貫

之柳古器縱橫猶識鼎衆星錯落僅名斗模糊半已似  
癡胝詰曲猶能辨跟肘娟娟缺月隱雲霧濯濯嘉禾秀  
根秀漂流百戰偶然存獨立千載誰與友上追軒頡相  
唯諾下挹冰斯同穀穀憶昔周宣歌鴻鴈當時籀史變  
蝌斗獻亂人方思聖賢中興天為生耆苟東征徐虜闕  
虓虎北伐犬戎隨指啖象胥雜還貢狼厥方召聯翮賜  
圭卣遂因鼙鼓思將帥豈為考擊煩矇眊何人作頌此  
崧高萬古斯文齊岫嶺勲勞至大不矜伐文武未遠猶  
忠厚欲尋年代無甲乙豈有文字記誰某自從周衰更  
七國竟始秦人有九有掃除詩書誦法律投棄俎豆陳  
鞭笞當年何人佐祖龍上蔡公子牽黃狗登山刻石頌  
功烈後者無繼前無偶皆云皇帝巡四國烹滅彊暴救  
黔首六經既已委灰塵此鼓亦當隨擊捃傳聞九鼎淪



泗上欲使萬夫沈水取暴君縱欲窮人力神物義不汗  
秦垢是時石鼓何處避無乃天工令鬼守興亡百變物  
自閑富貴一朝名不朽細思物理坐歎息人生安得如  
汝壽

對御歌

陳圖南

臣愛睡臣愛睡不卧氈不蓋被片石枕頭蓑衣鋪地震  
雷掣雷鬼神驚臣當其時正鼾睡閑思張良悶想范蠡  
說甚孟德休言劉備三四君子只是爭些閑氣爭如臣  
向首山頂頭白雲堆裏展開眉頭解放肚皮且一覺睡  
管甚玉兔東生紅輪西墜

勞歌

張文潛

暑天三月元無雨雲頭不合惟飛土深堂無人午  
欲動身先汗如雨忽怜長街負重民筋骸長鼓十石弩

半衲遮背是生涯以力受金飽兒女人家牛馬繫高木  
惜恐犇驅犯炎酷天工作民良久艱誰知不如牛馬福

孫彥古回風雨山水歌

山深巖高石壁青白日忽變天晦冥黑風驅雲走不停  
驚電疾雨來如頃山前雨點大如手山下水湧危槎橫  
崩崖古樹老有靈吼怒直與風雲爭枝披葉偃鱗不佞  
萬竅却欲藏雷霆鞭驢疾驅者誰子石路嶮澀驢凌兢  
目迷心懾愈走愈不及來憩樹下如寒蠅蒼茫直與鬼  
神接恍惚不保龍蛇驚平居此樂忽入眼孫家古圖纔  
可辨奈何一幅一尺餘欲奪天地之奇變我愛之良  
有以昔苦山行親遇此一生兩足不下堂輸爾朱門貴  
公子

七夕歌



人間一葉梧桐飄蓐收行秋回斗杓神官召集役靈鵲  
直渡銀河橫作橋河東美人天帝子機杼年年勞玉指  
織成雲霧紫綃衣辛苦無歡容不理帝憐獨居無與娛  
河西嫁與牽牛夫自從嫁後廢織絳驢雲鬢朝暮梳  
貪歡不歸天帝怒責歸却踏來時路但令一歲一相見  
七月七日橋邊渡別多會少知奈何却憶從前歡愛多  
匆匆萬事說不盡王龍已駕隨羲和河邊靈官催曉發  
令嚴不肯輕離別便將淚作雨滂沱淚痕有盡愁無歇  
我言織女君莫歎天地無窮會相見猶勝姮娥不嫁人  
夜夜孤眠廣寒殿

浩浩歌

馬子才

浩浩歌天地萬物如吾何用之解帶食太倉不用拂枕  
歸山阿君不見渭川漁父一竿竹竿野耕叟數畝禾喜

來起作商家霖怒後便把周王戈又不見子陵橫足加  
帝腹帝不敢動豈敢訶皇天為忙逼星宿相擊摩可憐  
相府癡邀請先經過浩浩歌天地萬物如吾何屈原枉  
死汨羅水夷齊空餓西山坡丈夫皤皤不可羈有身何  
用自減磨吾觀聖賢心自樂豈有他蒼生如命窮吾道  
成蹉跎直須為弔天下人何必嫌恨傷立軻浩浩歌天  
地萬物如吾何玉堂金馬在何處雲山石室高嵯峨低  
頭欲耕地雖少仰面長嘯天何多請君醉我一斗酒紅  
光入面春風和

觀易元吉猿獐圖歌

秦少游

參天老木相樛枝嵌空怪石銜青漪兩猿上下一旁掛  
兩猿熟視蒼蛙疑蕭蕭叢竹山風吹海棠杜宇相因依  
下有兩獐從兩兒花狼草齧含春嬉藝老筆精湖海推



書意忘形形更奇解衣一掃神扶持他日自見猶嗟咨  
金錢百萬酒千鷗荆南將軍欣得之老禪豪取橐為垂  
白晝掩門初許窺房櫳烟烟明冬曦榛藜羽革分毫釐  
殘編未終且歸讀歲暮有閒重借披

叢臺歌

賀方回

累土三百尺流光二千年人生物數不相待摧頽故址  
秋風前武靈舊壠今安在禿樹無陰困樵采王蕭金鏡  
未銷沈幾見耕夫到城賣君不聞叢臺全盛時綺羅城  
市遊春輝一從凋蟄閉荒草蕭散行雲無復歸韶魂想  
像風流在晴華露蔓猶依稀縈紆棘逕撩人衣木黍晚  
成貉貉肥層蒼碧瓦碎平地夢作鴛鴦相伴飛登臨弔  
古將語誰城郭人民今是秣指君看取故時物南有清  
流西翠微彷徨華表不忍去豈獨遼東一令威

武夷擢歌十首

朱仲晦

武夷山上有仙靈山下寒流曲曲清欲識箇中奇絕處  
擢歌閑聽兩三聲

一曲溪邊上釣船幔亭峯影蘸晴川虹橋一斷無消息  
萬壑千巖鎖翠煙

二曲亭亭玉女峯插花臨水為誰容道人不再荒臺夢  
興入前山翠幾重

三曲君看架壑船不知停擢幾何年桑田海水今如許  
泡沫風燈敢自憐

四曲東西兩石巖巖花垂露碧氈毼金雞叫罷無人見  
月滿空山水滿潭

五曲山高雲氣深長時煙雨暗平林林間有客無人識  
款乃聲中萬古心



六曲蒼屏透碧灣  
茅茨終日掩柴關  
客來倚擢巖花落  
猿鳥不驚春意閑  
七曲移船上碧灘  
隱屏仙掌更回看  
人言此處無佳景  
只有石堂空翠寒  
八曲風煙勢欲開  
鼓樓巖下水縈回  
莫言此處無佳景  
自是遊人不上來  
九曲將窮眼豁然  
桑麻雨露見平川  
漁郎更莫認桃源  
路險是人閒別有天

漢歌

蕭真卿

華陰雙壁傳山鬼  
報道明年祖龍死  
草間豪傑伺天時  
攘袖無衿爭欲起  
蓑祠辜火妖狐語  
涉為王張大楚  
南公舊有三戶謠  
東井新看五星聚  
中原茫茫走秦康  
天遣沛公興白屋  
大蛇斬斷素靈號  
蚩尤祭罷朱旗豔

鳩來扶義入關中  
恩結人心帝道隆  
秦法煩苛猶一洗  
項王慄悍何勞功  
三傑相須立人紀  
四老仍來安太子  
已令陸賈說詩書  
更詔孫通制儀禮  
阿翁著手規模遠  
獨恨兒孫讀城旦  
王純霸雜寧不知  
不是不知知已晚

楚歌

沙丘車過亡明鏡  
人頭畜鳴自賢聖  
阿房殿裏醉宮娃  
趙高手中持國柄  
群雄雲擾蕩山東  
邯鄲却墮秦圍中  
項王一戰動天地  
諸侯膝行趨下風  
割裂河山建吳國  
天下畏威心不服  
只貪衣繡榮楚猴  
豈識金刀得秦康  
楚歌一夜四面發  
泣別虞姬歌數闋  
殘兵半落似晨星  
獨騎凌兢踏寒月  
烏江渡口方喚船  
五侯追奔已江邊  
苦道天亡非戰罪  
劍化壯氣成飛煙  
君王雄武古無比  
獨無仁義誰相濟  
向能忠計資范增  
未必漢家能卜世



穀城東頭土一丘悠悠遺恨何年休

讀樂天無可奈何歌

趙宜之

鬼脛苦太短蛇足何其多物理斬不齊利劍空自磨老  
跼富且壽元惡天不訶伯夷豈不仁餓死西山阿天意  
寓冥邈人心徒揣摩不如且飲酒流年付蹉跎酒酣登  
高原浩歌無奈何

菖蒲歌

謝君直

有石奇峭天琢成有草天天冬夏青人言菖蒲非一種  
上品九節通仙靈異根不帶塵埃氣孤操愛結泉石盟  
明窓淨几有宿契花林草砌無交情夜深不嫌清露重  
晨光疑有白雲生嫩如秦時童女登蓬瀛手携綠玉杖  
徐行瘦如天台山上賢聖僧休糧絕粒孤鶴形勁如五  
口義士從田橫英氣凜凜磨青冥清如三千弟子立孔

庭回琴點瑟天機鳴堂前不入紅粉意席上嘗聽詩書  
聲怪石移蕩首充貢此物舜廊當共登神農知己入本  
草靈均蔽賢遺騷經幽人耽翫發仙興方士服餌延脩  
齡綵鸞系鳳琪花苑赤虬玉鱗芙蓉城土界真人好清  
淨見此靈苗當大驚我欲携之朝太清瑤草不敢專芳  
馨玉皇一笑留香案錫與有道者長生人間千花萬草  
儘榮艷未必敢與此草爭高名

六歌

文宋瑞

有妻有妻出糟糠自少結髮不下堂亂離中道逢虎狼  
鳳飛翩翩夫其凰將雛一二去何方豈料國破家亦亡  
不忍舍君羅襦裳天長地久終茫茫牛女夜夜遙相望  
嗚呼一歌兮歌道長悲風北來起彷徨  
有妹有妹家流離良人去後携諸兒北風吹沙塞草萋



窮猿慘淡將安歸去年哭母南海湄三男一女同歔歔  
惟汝不在割我肌汝家零落母不知母知豈有瞑日時  
嗚呼再歌兮歌孔悲鵲鵲在原我何為  
有女有女婉清揚大者學帖臨鍾王小者讀字聲琅琅  
朔風吹衣白日黃一雙白璧委道傍鴈兒啾啾秋無梁  
隨母北首誰人將嗚呼三歌兮歌愈傷莽為兒女淚淋  
浪

有子有子風骨殊釋氏抱送徐卿雛四月八日摩尼珠  
榴花犀錢絡繹襦蘭湯百沸香似酥欬隨飛電飄泥途  
汝兄十三騎鯨魚汝今三歲知在無嗚呼四歌兮歌以  
吁燈前老我明月孤  
有妾有妾令何如夫者手將不蟾蜍次者親抱汗血駒  
晨粧靚服臨西湖英英鴈落飄瓊瑤風花飛墜鳥嗚呼

金莖沆瀣浮汗淚天摧地裂龍鳳殂美人塵土何代無  
嗚呼五歌兮歌鬱紆為爾逆風立斯須  
我生我生何不辰孤根不識桃李春寒日煖重愁人  
北風隨我鐵馬塵初憐骨肉鍾竒禍而今骨肉重冷我  
汝在空今嬰我懷我死誰當收我骸人生百年何醜好  
黃髮得喪俱草草嗚呼六歌兮勿復道出門一笑天地  
老

正氣歌

天地有正氣雜然賦流形下則為河岳上則為日星於  
人曰浩然沛乎塞蒼冥皇路當清夷舍和吐明庭時窮  
節乃見一一垂丹青在齊太史簡在晉董狐筆在秦張  
良椎在漢蘇武節為嚴將軍頭為嵇侍中血為張睢陽  
髯為顏常山舌或為遼東帽清操厲冰雪或為出師表



鬼神泣壯烈或為渡江揖慷慨吞胡羯或為擊賊笏逆  
豎頭破裂是氣所磅礴凜列萬古存當其貫日月生死  
安足論地維賴以立天柱賴以尊二綱實繫命道義為  
之根嗟余遘陽九隸也實不力楚囚纓其冠傳車送窮  
北鼎鑊甘如飴求之不可得陰房闐鬼火春院閔天黑  
牛驥同一皂雞栖鳳凰食一朝蒙霧露分作溝中瘠如  
此再寒暑百沴自辟易哀哉沮洳場為我安樂國豈有  
他繆巧陰陽不能賊顧此耿耿在仰視浮雲白悠悠我  
心憂蒼天曷有極哲人日已遠典刑在宿昔風簷展書  
讀古道照顏色

文翰類選大成卷第八十八

文翰類選大成卷第八十九歌目錄

元

趙子昂 一首	劉夢吉 一首	虞伯生 二首
范德機 五首	楊仲弘 二首	郝伯常 一首
李子搆 一首	鮮于伯機 二首	辛文房 一首
傅與礪 一首	張仲舉 一首	祝蕃遠 一首
劉時中 一首	羅礪谷 一首	王子東 一首
甘允從 二首	貫雲石 一首	李萬里 二首
盧彥威 一首	夏溥 一首	揭祐民 七首
徐威卿 一首	張伯雨 一首	鄧文若 一首
張夢辰 一首	徐立本 一首	李坦之 四首
李仲恭 一首	黃誠父 五首	戴祖禹 一首
王景初 一首	張可久 一首	王尚志 一首



練梅谷一首	卓元野一首	陳剛中一首
危太樸一首	熊澗谷一首	劉用章一首
金信一首	楊廉夫二首	丁鶴年一首
吳立夫一首	張光弼一首	任叔實一首
張惟中三首		

文翰類選大成卷第八十九歌目錄

文翰類選大成卷第八十九

左長史上游李伯璵編輯  
伴 讀慈谿馮厚校正

歌類

元

燕支驄圖歌

趙子昂

騏驎裏世常有伯樂不生淹棧豆欵見此圖神自王  
 權竒磊落龍為友隅目精熒生紫光錦毛錯落蒙清霜  
 冰蹄蹙踏寒玉響霧鬣振動秋風涼朝浴扶桑騰浩蕩  
 暮秣崑崙超象罔雄姿似隘六合小盛氣欲蕭浮雲上  
 嗅塵一歎驚肉飛奮迅不受人間鞿豈惟萬馬羞欲死  
 直與八駿爭先馳只今相者多舉肥歎息此圖誰復知  
 君不見王處冲半生隱德真成癡



武當野老歌

劉夢吉

南陽武當天下稀峯巒巧避山自迷青天飛鳥不可度  
但見萬壑空煙霏山不知人從太古白雲飛來天作主  
旌旗明滅漢陽津幾閱東西互夷虜老人住此今百年  
自言三世絕人煙往事不聞宣政後初心欲返羲皇前  
脯鹿為糧豹為席竹樹蒼蒼歲寒國天分地拆保無憂  
怪見北風山鬼泣一聲白鴈已成擒回望丹梯淚滿襟  
傳語桃源休避世武陵不似武當深

白翎雀歌

虞伯生

烏桓城下白翎雀雌雄相呼以為樂平沙無樹托營巢  
八月雪深黃草薄君不見舊時飛燕在昭陽沈沈宮殿  
鎖鴛鴦芙蓉露冷秋宵永芍藥風暄春晝長

雲錦溪棹歌二首

雲錦溪頭春水生桃花為屋柳為城却騎赤鯉渡溪去  
手把芙蓉朝玉京

雲錦溪頭秋水清勸郎來此濯冠纓白沙見底眾魚靜  
黃葉滿林雙鷺明

雲林歌

為貢仲章  
俱奉作

范德機

朝望宣城夕企雲林掃花釣月清我閑心城東之山倚  
天碧手捫北斗近咫尺幽人築室面山坐絕似謝公  
時宅謝公今何在蒼苔剪行跡調笙誦新詩杯水照白  
石看水作明鏡年光靜來往夜深敬亭雨坐久南湖長  
清風被長坡鳥度菱葭響雲之林兮不可攀中有青猿  
白鶴相盤桓林之雲兮不可搏時來宿我虛簷端昂藏  
老仙人抱琴卧山側憶在中華時相逢髮未白問之不  
笑亦不言阿家中子瀛州客却起遺我寶字書依稀



攝精練魂魄相期後天無極年共爾守之合自然御氣  
還得同飛仙未登雲林堂試作雲林歌嗟我久客意衰  
邁雲林雲林奈爾何

奉和李監丞醉贈羽人之歌

自從墮地愛名山五岳尋真去不還青天無津度白日  
旦暮御氣行其間九江西來赴海門中有道路古來難  
笑談解入蛟蜃腹脫此命與松喬班吾嘗左揖三茅君  
右手直接高飛翰至今空濛偃翠蓋望雲懷我雙佩環  
君從茅山來青衣白霓裳肝膽出古劍剗截光甚揚玄  
元皇帝雲與仍稱世舉德昭未央偶吹龍管過九市共  
君斟酌北斗傍浪傳北斗不可揖酌之醉以白玉觴一  
觴未已已復醉授此織女天機章舉頭日送南歸鴈我  
自留滯君遠翔渺渺美人絳朱宮弦白雪兮歌清風浮

萍流水相遭逢何獨不在岐路中相思昨夜春缸紅

仍韻答梁掾冬菊之歌

中書省郎梁茂材嗜好雅與汜俗乖休衙歸來緊閉戶  
剝啄或為幽人開屋前枯楊千萬樹屋後官槐傍官路  
別來走亭翼瓦閒畫闥黃花夜冷句自別山城白兔公  
采英泛綠九秋同江清木落鴻鴈遠我思美人煙浪中  
彼美人兮無此美不見憂兮見之喜本是千巖萬壑姿  
如何肯落君家裏昨夜遣詩兒過門挑燈三誦月黃昏  
更酌迭倡未足報須要共倒花前尊君不見長安富兒  
買歌笑意擲千金惜年少桃李如今不似春勗子舍和  
保貞曜

釣臺歌

吾慕嚴子陵隱居富春山故人乘六龍身隨魚鳥閑羊



裘大澤雪在須忽來導從入皇都  
掉頭不受諫大夫高  
風逸節何代無慎勿滄浪輕釣徒

畫馬歌

錢君畫人勝畫馬安得名  
總妙天下青雲隱約見龍文  
有意軒昂駛華夏  
圍官山立頤而髯朱衣黑帶高帽尖  
問渠掌握詎有此牽控寧知人  
汝嫌君不見才士受束縛  
往往因之縱寥廓

題千里山水扇面歌

揚仲弘

公子丹青藝絕倫  
喜畫江山紈扇紙  
今好事購千金  
四幅相連成一卷  
春流漠漠如江湖  
飛煙著樹相有無  
嵐光注射翻長虛  
白玉盤浸青珊瑚  
追隨流潄轉蕭疎  
對此便欲山林居  
旗亭花發酒須沽  
舟行爲致雙提壺  
拍琴之子來相須  
醉歸不省何人扶  
旁有飛泉出巖隙

掣電飛霜相盪激  
蛟龍不受鯢桓食  
但見垂綸古盤石  
人生萬事無根柢  
出處行藏須早計  
一丘一壑倘如斯  
便可束書從此逝  
君不見鄒子直躬畊  
谷口垂千春臺  
芒勢利能沒身  
汝胡齷齪爲庸人

古劍歌

閑閑真人藏古劍  
敬之如神不敢忽  
賓客時來借一觀  
輒有悲風起  
倉卒人言此是金  
鐵精良工煅煉  
久始成  
動搖天地合變化  
崖蕩日月含光精  
昔年有蛟起江中  
口吐烈焰燒長空  
下民昏溺上帝怒  
雷電往擊皆無功  
嘗持此劍斬蛟首  
流血滔滔浸廬阜  
傳記傳聞時旣久  
不意世閒今尚有  
吾過下里多惡氛  
魍魎能食人  
請君爲我絕此怪  
一洗宇宙長清新

懷來醉歌

郝伯常



胡姬蟠頭臉如玉一撒青金腰線綠當門舉酒喚客嘗  
俊入雙眸聳秋鶻白雲亂卷鑛鐵文蠟香一噴紅染唇  
據鞍側控半淋鬃春風滿面不肯噴繫馬門前折殘碑  
玉液和林送官酒二十五弦粧百瑤一片冰泉落纖手  
須臾高歌半醜顏貂裘護盡不覺寒誰道雪花大如席  
舉鞭已過千銀山

懸瓠城歌

李子搆

我經懸瓠城試作懸瓠歌殘灰五百載懸瓠不復我有  
唐中葉失馭將退辱進危多詆謗准西孽離手指天百  
萬官兵不敢傍長安市上晝殺人司隸走藏魂膽喪晉  
公一語破紛紜意斷心謀神莫抗諫書不到雙闕下詔  
檢初成九天上煌煌日月煥斧節慘慘風雲動鞬鞞  
前虓虎神策軍愬武通顏分玉帳夜深雪花大於璧懸

瓠城頭血埋仗寒威方勁弓百鈞淨影不搖旗千丈已  
囚楔偷山更沸再戮鯨鯢海無浪蔡人不識緋衣兒劍  
氣磨天大丞相方城大將拜道左犀甲金戈光炫晃  
鬪狡衆五十秋白日青天破昏障兒童不遣避介冑婦  
女爭來沽綠釀入朝論功功有差晉公之功無與讓英  
雄事往名器虛粟斯嚙竟相尚外藩跋扈驕將侮中  
禁深嚴嬖臣誑山東何啻百少陽秦苑洛陽隨板蕩我  
歌懸瓠辭歌聲頗悲壯嗚呼唐之覆車將誰尤後人弔  
古徒哀愴懸瓠城亦汝水流懸瓠城邊牧笛唱懸瓠歌  
歌已終君不見豈碑野火化為土張望文公及晉公

水荒子歌二首

鮮于伯機

水荒子日日悲歌向城市辭危調苦不忍聞妻孥散盡  
餘一身城中米貴丐者衆崎嶇一飽經千門城中昔食



城外米城外人今食城裏耕者漸少田漸荒政恐明年  
不如此水荒子行歌乞食良不惡猶勝弄兵獄中死  
水荒子聽我語忍死休離去鄉土江中風浪大如山蛟  
鱷垂涎寧貫汝路傍暴客掠人賣性命由他還更苦北  
風吹霜水返壑稍稍人煙動墟落賑濟欲下通負除比  
著當年苦為樂水荒子區區吏弊何時無聞早還鄉事  
東作

蘇小小歌

辛文房

東流水底西飛魚銜得錢塘紋錦書幾回錯認青驄馬  
著處閑乘油壁車鸚鵡杯殘春樹暗薄萄衾冷夜窸虛  
蓮子種成南北岸苦心相望欲何如

仇工部古松歌

傅與礪

蒼松在山自竒古灌木翳之人不驚忽然圖向堂上壁

滿座歎息長風生交柯嵬走森晝晦其下將疑鬼神會  
霧雨寒霖虎豹毛雷霆怒折蛟龍背乃知巨筆老且神  
力幹造化雄千鈞皇天不天棟梁具后土潛凶霜雪春  
爾松已為人愛惜見爾為爾生顏色山中豈無材不倚  
絕壁未逢匠石嗟何益

重賦明山歌送符式有儀還武昌

張仲舉

肝母城南隱居者一生耕鑿肝南野何年移入明山來  
築樓山顛雲在下環山小塢三十六中有清池蔭桑竹  
日高塢口煙霧稍稍見行人出深谷池頭古井穿石空  
絕底暗與江流通井中鯉魚長尺半人不取疑蛟龍  
隱居何人曾子白誰其從者胥生式先生喜與小為徒  
意不在仙在樓居胥也來讀山中書溪翁野老時時一  
相過有筐盛蕨芍有酒盛壺興酣題詩滿青壁墨痕入



石青模糊華蓋浮丘石門麻姑鄰峯近壑可遊衍中山  
之樂足以適吾軀生今掉頭不肯住京塵茫茫歲云莫  
豈知印亦愛山人未辨山費得歸去曾先生幾時把杖  
明山行酒掃樓上聽松聲黃精飽啖一千日飛上丹梯  
朝玉京  
即席和貴學士月氏王頭飲器歌 祝蕃遠  
單于寶刀寒映雪月氏髑髏飲冤血泥丸真人辭絳宮  
曲生時能醉其骨鬪氏夜帳葡萄香拍拍春霞灑秋月  
賢王起舞舞谷蠡歌傳飲歡呼兩耳熱燈前人影半闌殘  
燈後青燐已明滅持盃為兩涕嶙峋胡為對此傷精魂  
弓蛇猶能致惑疾智瑤豈是無心人頭顱如此當速朽  
生禽誤入仇家手忍將鳴鏑射頭曼吁嗟降王爾何有  
後未漢使渚水東猶待留犁撓盟酒

淮南歌

劉時中

甕社湖中出明月斯須千山萬山白燭龍馳影不敢眠  
淮土風煙黯無色鼉鼉起啼鯁鱗舞荷風驚濤戰南浦  
湖天無光湖水立夜半行空洒飛雨東方搖搖天欲曙  
畢逋啼老扶桑樹淮天幽澹空素老蚌潛輝寂無處

幼輿折齒歌

羅礪谷

秋衫未成錦機語棠梨半花鳳一羽象末雪綜小龍移  
細呢銀光吐冰縷西鄰郎君東海歸芙蓉半白杏雨肥  
十二欄邊說幽怨勸織南浦鴛鴦飛含蘭匿蕙無消息  
春醒彤霞漾玉色小龍呵出風雨聲奔騰觸裂震白石  
白石國城三十六女子軍來兩城覆鸞歌猿嘯強激昂  
百戶風來如箭簇章臺公子真豪縱復以微言相感動  
郎君切莫更癡心忍作甘心可人痛



採桑歌

王子東

翻雲烏鴉影鬢髮颯颯風白燕雙俵俵橫波凝流斂蜻蛾  
兵蠶飼餒餓則那卡織挽柔剪綠柯六幅暗露侵縹緗  
饗殮薦誤暑隙過蠶飢葉稀寧不瘥千頭萬緒豈敢吡  
終以暖事期絲絀錦帷繡冕相婆娑人情好新不厭多  
倚門刺紋來聽歌載青載黃胡側頗樹聞耳語慎勿哦  
萬一出口他人訶纂纂桑葦如鳩何

昆明池樂歌二首

甘允從

綵鷁齊飛簇畫旗甲光如水入雲低長楊五柞遙相望  
笳鼓歸來日每西

博望封侯萬里還血流青海骨如山將軍新賜樓船印  
錦纜牙檣杳靄閒

采石歌

貫雲石

采石山頭石顏色采石山下江流雲行客不過水無跡  
難以斷魂招太白我亦不留白匡堂京華酒淺湘雲長  
新亭風雨夜來夢千載相思各斷腸

三尺水劍歌

李萬里

名鵬西人

其

其

龍侯手提三尺水清晨訪我古獄裏直愁雲氣感星辰  
滿目寒光素濤起玄冰凝結搖空青芙蓉白日生精液  
為君拂拭寶匣烟若積雪涵踈星起看天地雲冥冥  
誰其麾叱走六丁為擊風雨驅雷霆蕩滌氛祲萬國寧  
上頭銘字侯所作辭嚴義正發炳靈憐君少年負才氣  
每能仗義討不廷側身北望空馳情君不見燕丹鳳又  
得荆軻尊前繫筑揚悲歌咸陽西入萬狼虎白虹貫日  
橫秋河英雄事去一朝異奈此古來憂憤多憂憤多向  
誰語我有高懷亘千古黃金不用買功名失勢因之虎



為鼠嗚呼腰閒寶鐵棄如土為爾更歌公莫舞

鬼首法刀歌

犴狴雲黑風怒號古柏不蔭青天高白頭獄氣卒如虎  
示我鬼首之法刀刀光閃閃展秋練朱髮蒼髯颯青面  
玄冥使者為護持一叉蟠空起雷電雷公霹靂電火微  
恨血漠漠青燧飛妖狐跳梁天狗吠北斗白日無晶輝  
君不見東南群盜方馳突黃牛峽西更倉卒酒酣激烈  
風火生我欲持刀待明發青燈熒熒古獄中起來搔首  
亂飛蓬還君此刀淚沾臆嗚呼壯士今沈鬱

讀王維夷門歌用其意作歌續其後 盧彥威

憶昔祠客歌夷門七雄爭戰紛如雲信陵盜符侯嬴死  
鐵鎚擊碎邯鄲軍後來誰震關河響五季相乘如返掌  
當年意氣作飛煙空餘朽骨埋黃壤宋家九葉本百秋

仁涵義染還生羞壽山穹窿九州哭獨有遺民恨銷骨  
易水南流汴水清黃河不洗中原兵天戈一指八紘卷  
四海無波日月明雄臺屹立天垣近變息繼出扶皇運  
桑陰蔽日麥連雲坐看龔黃清列郡我來喜遇春如海  
瓦礫生煙變光彩紅塵撲面人不知獨過屠門吊朱亥

鳴門歌

夏溥

大風揚兮赤雲屯楚人埜氣昏龍文當時吾甚笑亞父  
幸至彭城疽背死誰云沐猴竟遭烹汝乃盛怒哈孺子  
嗟哉拔山之力不可得扶義而西取天下者以三尺君  
看項王重瞳舜重瞳天命迺在隆準公

淮安王吳山歌六首

揭祐民

澤欲不強用兵仁者師無威聲持百萬如雲行今所出  
時揚鷹不血刃惟功成



來南東用生道前旌後盾燾稱允戈存墮堡上鷗略  
匪勇暴泯殺機遂仁好  
東蒼龍入震澤民胥生道得國始用壯振太白徐用止  
田有獲兵山高著名勒  
虎丘奠西師安念越栖稽山完國既遜無脊殘泰伯祠  
在江干過禹穴俾勿灌  
王臨襄繼踰淮以所履規雲雷利建侯雄基開入圖像  
麒麟才眎王儀母能儕

笳鼓競鏘歌長王有靈福此方男吹笙女協黃撫琴瑟  
升中堂惠我抗時無彊

興勝寺歌

青齊門北邙山累累復累累何丹能大還使人墮清淚  
使人凋朱顏穆公以人從穴中田橫有士穿冢聞雖能

就義死傷勇空今後世悲潺湲燕昭築宮闕賢路聲名  
未終身謾故今人欲弔望諸君惟有黃埃黯墟墓我今  
有淚不到黃泉興勝之歌悲不可言

胡氏殺虎歌

徐威卿

濱州淳海縣兵籍有劉平其妻曰胡氏艱險常同經起  
赴零陽戍仍登兩兒行莫宿沙河岸忽聞嘯風聲一虎  
蹲其間視平若孩嬰吞臂曳之去胡氏躍且驚走逐十  
餘步擊足與虎爭急呼兒取刃屠虎肝腸傾虎斃平脫  
口扶歸李陽城一皮骨已碎三日乃瞑夫歿入黃泉  
婦哭入青冥風雲變黯淡禽鳥為悲鳴帥府取皋比列  
狀達省庭省庭壯其義復尸仍免征旌表鬼國政激勸  
通人情夫哉夫婦恩直與生死并死同葬虎腹生同食  
虎羹誰謂荆釵草乃有如此英班班古列女好事多丹



青宜將殺虎傳題徧家家屏

璧社明珠奔月危歌谷缺雅所作

滌盡含沙光不滅文昌四星吞在腹

蟹物還來作飲器日夜雄雌繞林屋

半葉蕉心卷未舒飲非其人躍如水

置之天上白玉盤斗柄挹酒長闌干

持勸我飲相交懽幽宮馮夷為予泣

還我平生老蚌胎許君醉卧蛟人

錦雉圖歌

鄧文若名伴江西人

錦衣綉翼何揚揚棠梨花開春雨香

只尺或是山之梁林深枳棘如人長

將軍歌

將軍歌

張夢辰

將軍走馬沙草場獐龍蹀躞鷹飛揚

所藏置罾如雲箭如雨滿眼禍機寧

豈直百兔死君不見李斯非相才上

見群龍歌

徐立本名安人

玄雲崔嵬半空黑大龍蜿蜒小龍直

海氣空濛海波立須臾復有三四龍

雷公擊鼓王女笑飛煙烈焰飄長風

六龍在天啓坤戶陽剛奮發無停機

我方扁舟湖上行見之頓覺雙眼明

乃知神物能通靈君不見葉公好龍

李太白酒樓歌

李坦之

真龍下可憐辟易走且驚不識真龍

溧陽酒樓春水涯白也繫馬樓東家



猶吹玉笛引吳娃日斜樓外春風起春愁滿眼楊花裏  
高歌一曲下樓去傳徧江南數千里錦袍綠水迷蹤跡  
落日空梁照顏色江頭盡日不見人樓上幾人無此客  
倚欄仰看西飛雲如何不飲憂其身只今寂寞千秋後  
誰酌米石江邊墳

山中苦寒歌

深山苦寒弗可居門前積雪三尺餘陰崖一夜石蛇骨  
寒溜萬戶冰垂鬚道人凍卧山之麓莫爇松明煮溪綠  
山陰孤棹期不來夢入幽巖聞折竹征西將軍持短兵  
馳馬夜渡黃河冰關東諸將面欲裂巖光獨釣桐江雪

悲戰士歌

吾聞上古無為天下治兵車首自軒轅氏湯武爭王起  
征伐秦併山東乃稱帝亂世英雄力排王四海生靈血  
塗地中原落木風颼颼一度興亡一度秋乾坤百戰日  
月黑秦華不動黃河流玉關旌旗拂太白王師萬里開  
絕域春風草綠師未還鐵箭飛書問消息功名不願萬  
戶侯富貴不願千金裘但願朝廷有道烽燧息結屋深  
山看青壁

高將軍白鷄子歌

淮西猛士高將軍新獲驍禽被涼素調之弗顧情未狎  
跨馬臂出東城去征鴻作字雲邊斜聳身直上誰能遮  
天寒日暮望不見北風萬里吹瑤花雲飛忽斷鴻飛却  
短草長煙際沙漠但餘孤色搖清秋未許纖毫生碧落  
歸來珍衛不解鞬親手餒肉供飢喉英雄遇合固有分  
可惜驚塵俱白頭

西山歌

李仲公



西山有廬以我逶迤東田有絲以我療飢春之日宜桑  
為父母裳冬之日宜酒為父母壽

棹歌五首為松江漁者李復禮作 黃誠父

麻姑山前江接天女兒浦口好泊船船頭鷗鷺不相識  
飛上釣魚竿上眠

柳花吹雨漫天飛新婦磯頭夜不歸寄語彭郎莫相妬  
春江處處鱖魚肥

松花壓酒香滿卮鱸魚作鱠光陸離舡頭打漿弄明月  
船尾敲舷詞竹枝

小魚易釣不直錢大魚往往潛深淵漁者日取小魚去  
還使大魚長棄捐

打魚不用網截江釣魚莫使鉤倒鉉截江一日錦鱗盡  
倒鉉入腹傷魚腸

天馬圖歌

戴祖禹

月支天馬難再得誰向君家貌真跡鬣尾皎潔骨肉白  
駉駉驪駟敢同色當時超逸真絕倫皎如玉龍下天門  
朝馳駿坂飛匹練暮浴深淵浮素雲四蹄飽踏咸陽月  
滿身猶帶燕山雪只愁玄霧閔神姿未許清塵汗汗血  
飄然却立精神聚想見落筆驚風雨他年開匣君勿驚  
照室神光夜飛去

窮途歌贈李漢

王景初

君不見人生堂堂七尺軀安能貧困守一隅青雲黃鵠  
看一顰直須遠遊浩蕩觀九區羲和有車不我御坐使  
憔悴悲窮途窮途不須悲有酒更須酌玉劍匣幽塵英  
雄半凋落虫魚紙上癡半生有眼何堪望臺閣休休休  
世閒萬事俱悠悠布衣未必輕王侯天門耽耽卧九虎



被髮往叫君何求

天劍歌

張可久

將軍躍馬來南荒腰間古劍白練光  
鷓鴣塗香魑魅泣寒芒  
熠熠勾陳蒼龍髯高釘珠堂  
月玉華曾拂樓蘭雪為君盡斫奸臣頭  
天狗三更下紙血

遲國回使歌和江東羅做韻 王尚志

江東先生遠叩門口誦遲國回使歌  
高秋夜靜客不寐歌辭激烈聲滂沱  
東南島夷三百六大者只數遲與俊  
進人云是赤眉種自昔奔竄來海阿  
先皇在位歷五載風清孤嶼無揚波  
方今聖代沾德化繼進壞頁朝鸞和  
紫金為泥寫鳳表靈龜象懸鳴珂彤  
庭懷遠何所賜黃驪白駱兼青騮  
并裳使者錢塘客能以朔易通南詔  
遙授將軍領州牧拜舞兩頰生微渦  
樓船歸指西洋路

向國夜夜瞻星河金雞凋晰火龍出  
三山宮闕高嵒我番陽驛吏親為說  
今年回使重經過先生作歌既有以  
却念黎獠頻驚叱田橫乘傳嗟已矣  
徐市求仙胡爾記豈如遲國效忠義  
勲名萬世同不磨

木絲歌

練梅谷

吳姬織綾雙鳳花越女製綺五色霞  
煙熏麝染脂粉氣落落不到山人家  
蜀江種老鵠銜子種我南園餅春雨  
淺金花小亞黃葵濃綠苞肥壓青李  
吐成秋繭不用繰迴看春滿真徒勞  
為繆奇滑脫絨核竹弓弦緊翻雲濤  
梭準一箸光奪雪紡絡新絲細如髮  
津津貧妾得野蠶軋軋寒梭緯霜月  
布成奴魂白氎氎價重博取青銅錢  
不須坐我爐火上便欲挾纈春風前  
衣無羨惡煖則一木絲裘敵天孫  
織飲散金山弄玉簫風流未遜揚州客



采茶歌

卓元野

山之顛水之涯產靈草年年采摘當春早製成雀舌  
鳳團題封進入幽燕道黃旗閃閃方物來薦新趣上天  
顏開海濱亦有閒出才弓旌不來無與媒長年抱道  
蒿萊撚髭吟盡江邊梅嗟裁人與草木異安得知賢  
知味

吳宮子夜歌

陳剛中

紫貝樓闕鬱金香  
雲七十紅鴛鴦  
玉蟬笑擁霞銷裳  
星河不墮宮漏長  
綠尊艷麗麟髓泣  
露華花寒秋不濕  
歛瑟一聲起  
雪濤海龍來  
嗟如人立誰知  
淺嘖娥半掃  
中有殘螢滿  
愁沼越兵曉  
路西風來碧波  
一夜芙蓉老

徐人歌

危太樸

季子有劍秋水色徐君見之惜不得徐君墓上荒草寒

季子解劍掛樹閒一死一生見交義嗟我延陵吳季子

木絲歌

熊澗谷

秋陽收盡枝頭露烘綻青囊翻白素田婦攜籃米得歸  
渾家指作機中布大兒來覓襦小兒來覓袴半擬償私  
債半擬輸官府竹籠漸著活火薰蠹虫母子走紛紛尺  
鐵碾出瑤空雪一弓彈破秋江雲中虛外泛搓成索畫  
夜踏車聲洛洛車聲才冷催上機知作誰人身上衣小  
女背面臨風泣憶從隨母園中拾

安將軍歌

劉用章

安將軍紫髯鏡面多戰勳猛氣散作西山雲前年紅巾  
入城府赤子滿城誰父母將軍血戰城東門五百健兒  
齊奮武更有大郎猛於虎身屬橐鞬寶刀舞打馬奪橋  
入賊塢殺賊盡作河邊土將軍父子真有功今日渾如



筆畫空將軍功豈不好并山入雲青不子

馬氏奉萱堂歌

金信

人生有母憂不忘來登馬家萱草堂人生兄弟爭喧譁  
來看馬家萱草花馬家萱草人所愛日日看花滿堂背  
馬家兄弟三連枝堂下奉觴堂上醉花開箇箇鵲背黃  
翠葉舞風羅帶長白頭骯髒不下堂堂二婦相扶將  
大婦工織素細意熨貼光請姑更作新衣裳中婦斫鯉  
魚洗手作羹湯阿姑未食不敢嘗小婦折花來為姑添  
新粧更持玉鏡臺照姑髮影春風香馬家不知人子道  
安得馬家三婦孝君不見東鄰少年遊不歸夜夜婦姑  
相勃磈

虞美人歌

楊廉夫

拔山將軍氣如虎神騅如龍竭天下所將軍戰敗歌楚

歌美人一死能自許蒼皇伏劍答危主不同墜雉隨仇  
虜江邊碧血吹青雨化作春坊悲漢土

鐵笛歌

鐵崖道人吹鐵笛宮徵含嚙太古音一聲吹破混沌窟  
一聲吹破天地心一聲吹開虎豹闥彤庭跪獻丹宸箴  
問君何以得此曲妙諧律呂可以召陽而呼陰都將春  
秋一百四十二年筆削手譜成透天之數價重雙南金  
掉頭王署不肯入直入并峯絕頂俯瞰東溟深玉網正  
統著高論唾彼傳癖兼書淫時人不識我不獻會有使  
者徵球琳具區下浸三萬六千頃之白銀浪洞庭上立  
七十二架之青瑤岑莫邪老鐵作龍吼丹山鳳舞江蛟  
吟勗哉宗彥吾所欽赤泉之盟猶可尋更吹一聲振我  
清白祖大鳴盛世載賡阜財解愠南風琴



環翠樓歌

丁鶴年

大山摩穹霄小山翻洪濤或翔丹穴鳳或舞寒江蛟奔騰起伏奇觀不可狀雲錦屏風金碧障中有仙家太古壇鳥啼花發春自閑子晉鸞笙乘月過玉喬鳧舄凌雲還環翠樓開紫霞裏更揖雞峯朝舜水千巖秀色傍窻浮萬壑濤聲從座起煙消日出天溶溶玉壺倒插金芙蓉鉤簾相對坐長夏灑然冰雪生心曾君不見天台嵯峩四萬八千丈若非飈車羽輪那得上又不見終南盤亘中原五百里天梯雲棧懸絕那可履何如羽人高居環翠樓調笑日月輕公侯仙韶靈響每坐聽耳觀霞城時卧遊還丹鍊就顏如玉讀書學道日不足琅函金檢五字言錦帙牙籤三萬軸星為冠兮霓為裳或參麒麟翳鳳凰翩翩上游白雲鄉手把絳節朝紫皇鈞天九奏

賜霞觴醉乘冷風還下方眼空四海小八荒層樓栖真壽而昌此名此境孰敢當藍山道士身姓梁

天台山花蕊石筆架歌

吳立夫

天台高山屹蒼空山神染石填青紅良工琢之手運風閣我綵筆虛玲瓏勾芒香動土膏發蓬萊髓流花作骨一雙粉蝶迷宿魂五色斑龍蛻幽窟古硯南披黯淡灘摩挲鵠眼映豬肝低窺墨池渤澥碧仰倚書鎮嵩峯寒滿案層巒何處所宛陵老兔論功緒錦繡心腸吐有雲蒼苔面貌疑為雨翰林學士花生筆京洛新來花樣出浮花浪蕊一掃閒嘆息楊雄白我玄

天馬歌

張光弼

天馬來自蒲郎國足下風雲生倏忽司天上奏失房星海邊產得蛟龍骨軒然卓立八尺高衆馬挽首羞徒勞



色應北方鍾水德滿身日彩烏翎黑縱行不受羲和轡  
肯使王良馭輓輓黃絲絡頭兩馬牽金轡雙垂玉作鞭  
寵榮日賜三品祿不比衛鶴空乘軒大國懷柔小國貢  
君王一顧輕爲重學士前陳天馬歌詞人遠獻河清頌  
繫旂屬車相後先受之却之俱可傳普天率土盡臣妾  
聖主同符千萬年

月下歌

任叔實

月從東出西壁沈曾照千古萬古之人心人心只有月  
照破達人當之成酒滌卿不聞李太白蘇子瞻把酒頻  
問月無月酒不斟月爲抵愁之白玉酒爲買笑之黃金  
吾徒俛仰明月下月亦傲兀窺人深徑須椎罌倒甕爲  
月盡一醉如何青天白眼放月還西岑狂歌他日作佳  
事共道此樂今宵今

琴劍歌送龍子高復學之閩

張惟中

君不見王郎贈君龍泉之劍可三尺綵緜消磨土花蝕  
又不見桂子贈君神鳳之琴無一絃錦囊零落珠絲懸  
千年舊物連城壁持至京都人未識黃埃壓城冰塞川  
幾何不墜同瓦礫龍君張其絃淬其鏑鳳忽有聲龍露  
角都人聚看走相傳齊瑟琴鉤俱寂寞昔君韜光誰見  
知亦如琴劍塵土時文章煥爛雲錦機脫穎不啻囊中  
錐得官歸來東海涯二物無恙還相隨相隨又下閩南  
路我作長歌送君去日暮三山不見雲文星一點天  
處五月初來花滿城榕陰駐馬聽啼鶯荔枝新劈江家  
綠翠杓銀罌莫專停白日易西匿江水無迴波請君載  
舞王郎之劍彈桂子之琴歌我之歌故人之情不我極  
千里相思奈爾何



醉時歌與茅原禮

我生自負江海客足跡不落公侯宅老去非誇酒量寬  
醉來但恠乾坤窄清泉白石知我情意氣爲重山爲控  
幾年契闊同門生邂逅相逢雙眼明喜極不覺狂歌起  
萬籟無聲天在水東山峇響西山高下視富貴槐根蟻  
微風飄飄生暖塵滿懷拍拍皆陽春人生至樂有如此  
齷齪不飲爲何人君不見昨朝金印大如斗矢勢只落  
他人手又不見昨朝華屋圖蛟螭轉頭荒址藏狐狸自  
非身有神仙骨終爲區區利名沒何如再敘平生歡日  
夕不放杯中物

汗酒歌

汗酒之法出羌中下離上坎燒丹同醇醪初混人莫測  
清濁自判天無功銀瓶濕透珠顆冷曉起宿醒薰易醒  
醪醱花開露滴香玻璃月浸秋無影興來浩吸如長鯨  
四座不覺春風生也知黃封不足並更怜白墮空得名  
絕代清標古稀有誰復重歌薄薄酒伯倫荷鋪迹已陳  
那得相逢傾一斗

文翰類選大成卷第八十九



文翰類選大成卷第九十歌目錄  
 國朝  
 劉基十一首  
 高啓二首  
 楊基一首  
 鄭洧一首  
 華克勤一首  
 管訥六首  
 陶凱一首  
 孫炎一首  
 揭軌一首  
 顧祿二首  
 孫賁二首  
 解縉二首  
 胡廣二首  
 錢宰二首  
 胡儼一首  
 楊士奇一首  
 時季昭一首  
 高柄一首  
 趙晦一首  
 李時勉一首  
 黃淮一首  
 吳溥三首  
 胡奎一首  
 曾榮四首  
 張珍一首  
 王英一首  
 李禎二首  
 林鴻二首  
 黃玄一首  
 王懌二首  
 梁昇一首  
 周忱一首  
 黎充輝一首

文翰類選大成卷第九十歌目錄

國朝

劉基十一首	高啓二首	楊基一首
鄭洧一首	華克勤一首	管訥六首
陶凱一首	孫炎一首	揭軌一首
顧祿二首	孫賁二首	解縉二首
胡廣二首	錢宰二首	胡儼一首
楊士奇一首	時季昭一首	高柄一首
趙晦一首	李時勉一首	黃淮一首
吳溥三首	胡奎一首	曾榮四首
張珍一首	王英一首	李禎二首
林鴻二首	黃玄一首	王懌二首
梁昇一首	周忱一首	黎充輝一首



藺從善 一首	立濬 十一首	胡濟 一首
釋宗泐 二一首	鎰師邵 三首	張楷 四首
萬節 一首	楊軾 一首	張一民 一首
周敘 一首	夏時正 八首	張瑄 十首
夏埴 十首	馮定 十首	王祐 十首

文翰類選大成卷第九十歌目錄

文翰類選大成卷第九十

左長史上海李伯璵編輯  
伴讀悉谿馮厚校正

歌類

國朝金碧山水圖歌  
武陵桃源今有無  
展書渾如夢中見  
青螺作山綃作雲  
白首蒼茫暖芳甸  
雄梁跨壑矯脩虹  
走瀑懸崖激飛電  
紫鳳宵鳴梧樹枝  
青雉曉啄桃花片  
鳥啼長是艷陽時  
草色寧隨霜雪變  
衣冠尚存周典則  
租稅不輸秦郡縣  
山中肉芝羨堪食  
澗底石泉清可嘯  
安得此地結茅屋  
寄書漫託雙飛燕

琅玕王歌三首



駿馬須好鞍強弓須勁箭將軍不知名健兒空自健  
香羅金縷衣采花弄春暉花高折不得空步綠莎歸  
出門無情親大道行亦窄寄語遠遊人君貧勝爲客

懷懷歌五首

白惡養雛時夜夜啼達曙如何羽翼成各自東西去  
昨夜霜風起入戶復吹帷兒啼母心酸母愁兒不知  
養兒圖養老無兒生煩惱臨老不見兒不如無兒好  
食藥苦在口食蓮苦在心苦心人不知苦口淚沾襟  
男兒初生時逢矢桑弧弓老大却思家懊惱無終窮

畫竹歌爲道士蒼明德賦

我所思兮在瀟湘蒼梧九疑渺無際但見綠竹參天長  
上有寒煙疑不飛下有流水聲浪浪中有萬古不盡離  
別淚化作五色丹霞漿穿崖貫石出厚地風吹露條宵  
有升我欲因之邀鳳皇天路脩阻川無梁孰知畫史解  
人意能以造化歸毫芒虛堂無人白日靜使我顧盼增  
慨慷玄霜慘烈歲將晏庭啼鸚鵡天悲涼我所思兮杳  
茫茫山中紫筍春可茹歸來無使造相望

夜聽張道士彈琴歌

白閒舍光月照席梅花入蒼珠的皜蓋宮道士彈七弦  
明星在樹霜滿天錡如暗泉發幽竇悄若空山叫哀狝  
霧雨寒吹松柏響波濤怒激蛟龍鬪神奔鬼恠入杳冥  
鷹孤鶴寡風冷冷湘娥宵攀竹枝泣紫鳳曉啄梧桐鳴  
悽悽欲斷還復續啼鶯一聲春草綠若然清商行素秋  
落葉灑地虫啾啾擁衾聽之消百慮夢逐行雲自來去  
九疑連天洞庭遠海闊煙深不知處蓋宮道士聽我語  
世無子期誰識汝桑閒濮上方施行白雪陽春葉如土



宛轉歌

星稀月白河闌干  
飢蟲顛號莎草寒  
美人望月歌宛轉  
滿湘水碧蒼梧遠  
愁魂一夜不得歸  
化作斷雲天際飛

隔谷歌

戰鼓咽悲風  
弓折不可把  
弟兄隔谷不相聞  
只尺人間與泉下  
丈夫誓許國  
殺身非所憐  
兩心本一氣  
何能坐相捐  
登埤四顧望  
慷慨肝膽裂  
不見救兵來  
但見繞城鐵甲光  
如雪飛禽在羅網  
尚或念其飢  
身為高官馬食粟  
忍見手足居重圍  
相彼鴻與雁  
亦各顧匹儔  
挽弓射一猿  
群猿拔箭聲  
啾啾鳥獸且有情  
人心獨何尤  
嗚呼田家紫荊雖微木  
不忍聽君歌隔谷

堂上歌

高啓

堂上歌歌南山主人為歡  
仰客顏翠帷夜卷出兩鬢移

尊更飲花樹閒  
花樹閒有明月客不醉  
歌不歇

鶴媒歌

鶴媒獨步荒陂水  
仰望雲閒不飛起  
遠者過鳥下南汀  
鼓翼相迎似相喜  
共為羽族生水鄉  
暫從飲啄無猜防  
草盾俄開中潛弩  
弋師謹笑媒矜舞  
嗟爾高潔非凡禽  
胡為狗食移此心  
受人馴養忘遠舉  
好陷同類機腸深  
嗚呼世閒幾人號  
君子得利相傾亦如此

黃鶴生歌

楊基

君不聞眉山道士徐佐卿  
化為黃鶴朝太清  
還君金僕姑留得千載名  
又不聞穹窿小仙徐子貞  
翩翩自稱黃鶴生  
鍊形蓬萊山鳳臆  
紫燕膺千有六百年  
飛上白玉京  
玉京錦具闕十二樓  
五城娟娟萬青娥  
吹笙來相迎  
黃鶴生骨相竒  
金衣玄霜裙  
纖指而洪髀  
不飲華池漿



不啄青田芝恥彼五色鳥覽德輝下之浮丘不能招八  
公不敢騎飄然從西來不使上帝知帝遣紫虛玄君魏  
夫人夜乘白鸞來相追琅霄頃刻九萬里追之不及鸞  
聲悲黃鶴生請少留爾為黃鶴舞我為黃鶴謳使須臾  
玉簫登爾黃鶴樓樓高幾百尺見三島十洲瓊珠金光  
草鐵網珊瑚鉤樓今已搥碎瓦礫三千秋黃鶴生孰與  
倚母乘腰纏人扶搖上揚州揚州瓊花已枯死仙人不  
復來追遊黃鶴生銜爾口母嚙紫泥書寄與西王母王  
母見爾笑起作小垂手黃鶴生來爾聽崑崙十二峯朶  
朶芙蓉青上有雙羽箭金鏃孔翠翎為我取之來射此  
天狼星坐令談笑閒四海煙塵清爾亦策爾勳我為爾  
勒銘更呼薛少保圖爾雲臺形黃鶴不肯顧長鳴掉頭  
去路逢鍊龍君亶亶道其故龍君勸不止竟觸龍君怒

手挽黃鶴衣醉叱黃鶴住黃鶴不敢去飛遶三華樹夜  
深鐵龍睡不醒黃鶴高飛不知處

雙松小隱歌

鄭洧

曹君昔隱金盆山藥爐夜煮黃金丹舉身欲約赤松子  
握手長笑青雲閒曹君今住沙溪曲傍水依崖結茅屋  
黃塵截斷不敢飛適意頻來雙厲王屋南屋北多鮮奇  
異葩靈卉承華滋喬松百尺不僵亦不死狀似飲川蟠  
谷之蛟螭角鬣分明儼如畫老榦不受秋風欺一瓢獨  
掛忘來歸竟與人世相睽違有時携尊踞白石苔花染  
盡霞閒衣有時掬水邀皓月碧波夜浸青玻璃生平不  
願輕裘肥馬誇富兒亦不願腰懸盤綬光陸離白麻耕  
雲不須驅曉來種滿山前芝飢餐六氣飽於飯渴飲零  
露甘如飴從茲覽遍中黃辭真一有象丹成基瘦骨昂



藏聳玄鶴芳顏瑩白逾華脂何須金華山中牧白羝河  
須葢珠宮裏調刀圭但得有色如揀梁摩挐銅狄河之  
湄摩挐銅狄河之湄桃源深處尋安期

應制賦醉學士歌

華克勤

考功監丞

內廚官酒蒲萄綠黃帕擎來氣芬郁詞林老臣被寵光  
拜捧瑤觴形局縮况當

天威咫尺聞春紅頓覺生醜顏醉來不知烏帽側猶解  
披腹呈琅玕近來應制文成軸對揚字字皆珠玉雖然  
白髮祇兩肩蠅頭細字還能讀

聖皇卹老恩最優幾回錫燕瑤池秋從容共樂有如此  
未讓十八學士登瀛洲李白當年飲一斗下筆玉堂皆  
袖手才華何必分先後竹帛垂名同不朽

桃花歌次韻答李翔

管訥

春來看花須及早莫待韶光去如掃年年花發看應遲  
幾多狼籍被風吹今年無風亦無雨千樹桃花紅爛吐  
香塵繡轂動遊人流水漫延出歌女天氣艷陽三月時  
倚闌吹徹玉參差百壺送酒莫停飲祇恐落花辭故枝  
落花飄盡春無迹著意留春花可惜花開花落一番春  
與君莫作傷春客會須日日醉花前不放閒愁到酒邊  
有花可看酒可飲但願以此終殘年

敬賦天馬歌

昔聞天馬不易得房星降精產西域雙蹄並截白玉光  
一身渾染玄雲色雄姿非駢亦非駮八尺乃是真龍媒  
天生權奇特神駿烏騅赤兔皆凡材風尾蕭蕭耳雙聳  
萬里騰驤塵不動番臣重譯貢中華黃金論價如山重  
太僕養之十二閒立仗曉聯鷄鷩在廷畫史皆國手



乃為寫真傳世聞當今  
聖主脩文德遠裔窮荒俱混一不用勞師圍太宛年年  
擬獻三千疋

吳農四時歌四首

家有田廬泖水東門前九朶翠芙蓉鄰翁報我田官至  
明日花朝候勸農

洪北洪南雨一犁陰陰桑柘鶉鳩啼木龍閑掛茅簷下  
百畝新秧已插齊

種得紅芒與白秈五風十雨似堯年高田無旱低無潦  
多辦今年賽社錢

東鄰社鼓接西鄰酒滿槽頭稻滿囤官稅已輸私債辦  
白頭甘作太平民

長平戈頭歌

陶凱

長平野人鑿地得古戈上有款識字歲久俱滅磨惜不  
能如豐城古劍射牛斗吁嗟戈乎奈爾何但見青銅凝  
寒莫煙紫月黑山深夜飛雨恨血千年猶未消荒郊夜  
寒帶冤鬼當年相括輕秦人降卒秦坑化為土嗟哉越  
亡秦亦亡落日荒城自今古摩挲爾戈一問之令人為  
平生愁思何不以爾為鍾鐻何不以爾為鼎彝吁嗟戈  
乎徒爾悲爾今還當太平世人閒銷兵鑄農器願壽吾  
皇千萬年終古不用戈與鋌

寶劍歌

孫炎

寶劍光耿耿佩之可以當一龍只是陰山太古雪為誰  
結此青芙蓉明珠為寶鐸為帶三尺枯蛟出冰海自從  
虎革裹干戈飛入芒碭育光彩青田劉郎漢諸孫傳家  
惟有此物存匣中千年睡不醒白帶血染桃花痕山童



神全眼如日時見蜿蜒走虛室我逢龍精不敢彈正氣  
直貫青天寒滌君持之獻明主若歲大旱爲霖雨

傳將軍歌

揭軌

傳將軍兄弟二人如鳳麟曩隨豪俊討紅巾白馬連翩  
經戰塵金羈耀素雪寶劍決浮雲擐旗漢水上斬將江  
之濱交長九尺空食粟括讀父書何足云將軍短小精  
悍姿一出奇計驚萬人兄弟並驅身白戰青春賞功親  
引見白玉珂聯鴻雁行黃金印綰麒麟殿傳將軍無與  
儔百萬紅巾不足收江花未落君不留君不留爲分  
天子河南憂

攬秀樓歌爲彭尚文賦

顧祿

巍乎高哉攬秀之樓兮吾不知其幾百尺突兀直倚青  
天開八窓浩浩納雲氣蔽虧日月奔風雷二泖之波濤

兮隱若白虹萬丈從西來倏然繞城而南匯直與海水  
爭喧豨龍塘狹束不可以迳度蹴起雪浪空中堆群山  
北峙鸞騰蛟躍兮聯絡八九高崔嵬初疑五老峯彭郎  
怒踢香爐頰又疑金芙蓉朶朶削出青雲隈浮嵐騰翠  
千萬狀變化恍惚真奇哉樓中之仙人古貌何偉傀黃  
冠野服紫蘭佩巾披大帽烏紗裁拍闌長嘯以手承頰  
狀與磅礴之奇秀兮呼吸盡使歸兮懷下視十二衢車  
馬愁黃埃仙人邀我笑談談諧意氣相傾了無嫌精明  
霞旭日爭照耀儼如坐我紫府金銀臺何必周流八表  
歷覽九垓南涉沅相東尋天台狂歌弔古茫然使我心  
神哀况彼自昔妖兵構災靈踪異迹盡成蒿萊齊雲落  
星杳不知何所兮洞庭黃鶴幾變昆明灰豈若茲樓之  
獨存兮聊與子兮徘徊安得壯士倒滄海手攀北斗爲



尊疊李白騎鯨為我起一飲豈限三百杯酒酣玉色淺  
後逸真天才使之和我歌萬象中胎胚大字揭諸梁棟  
開雲漢五色長昭回其  
我本雲間人夙契雲山緣聞公巢雲處愛作雲巢篇公  
家雲巢在何許會出雲海邊山頭日日白雲起雲  
峯萬朵浮青蓮山人結屋入雲去置身直上雲松巔雲  
蘿泮尺覆戶外檻下百道來雲泉雲翁住其閒日與雲  
周旋或攜雲鶴遊或伴雲龍眠食雲子兮漱雲液被雲  
衣方駕雲駟有時看雲發高詠落筆往往凌雲煙浮雲  
世事豈能絆蕭散自是雲中仙我欲乘雲走相覓雲路  
峻絕難躡緣爾來山人棄雲出我今亦是青雲客雲騎  
橋南古汴津一笑相逢雲水白問公別雲今幾年側身

東望雲茫然又掛雲帆拂滄海歸去自種雲中田

南園歌寄王河東彥舉

孫賈

昔在越江曲南園抗風軒群英結詩社盡是詞林仙南  
園二月千花明當門綠柳啼春鶯群英絡組照江水與  
余共結滄洲盟滄洲之盟誰取雄王郎獨有謫仙風狂  
歌放浪玉壺缺劇飲淋漓宮錦紅青山日落情未已王  
郎拂袖花前起歡呼小王彈鳴箏醉倚庭梧按宮徵哀  
絃冷冷樂向終忽看華月出天東裁詩復作夜遊曲銀  
燭飛光如白虹當時意氣凌寰宇湖海詩聲萬人許酒  
徒散落黃金空獨卧茅簷夜深雨分飛幾載遠離群歸  
來城市還相親閑來重訪舊遊處蒼煙萬頃波粼粼波  
粼粼日將夕西風一葉凌虛舟猶可題詩向青壁

羅浮歌寄洛陽李長史仲脩



亭亭西樵峯宛在南海湄日華麗仙掌影漾金銀池我  
昔扁舟縱長往凌風浩蕩煙霞想幽尋更欲探神奇復  
向羅浮事仙賞仙家三十六洞天羅浮巖與滄洲連丹  
霞射影四山靜群真環珮來翩翩築珠之峯數千丈君  
時與我緣蘿上水簾直下飛晴虹萬壑天風度流響山  
中劉郎司玉臺仙書授我琅函開心如明月烟虛照身與  
浮雲同去來此時會合那能再塵土分飛忽三載我行  
奏賦登金門君亦乘輅度淮海淮海迢迢煙樹深相思  
歲晚結愁心晴天萬里碧雲遠何由一寄還山吟山中  
洞房春寂寂山中之人長歎息松花酒熟人不歸瑤草  
東風幾回碧

聽琴歌

解縉

君是洪都人文彩何彬彬一生節操冰霜厲十載交游

湖海春有才不肯事生業往來慣作侯門客樓船海上  
釣金鰲車馬門前攢綉輓行囊只載書與琴秋來冬去  
尋知音文絃彈出白鶴舞武絃調處蒼龍吟一聲小水  
晶盤內明珠走梅花落地聽無聲雲淡風輕天杳杳一  
聲高在風大海翻波濤梧桐葉落敲窓響半空靈籟聲  
漕漕一聲緩松篁戛玉湘江畔水聲嗚咽下寒川猿嘯  
青蘿夜將半初絃急切二絃遲鶴鳴華表風淒淒少陵  
無人謫仙死黃金難鑄鍾子期三絃四絃閒徵羽美人  
簾下低低語清風明月不等閑白雪陽春奚足比五絃  
音韻諧宮商將軍劍佩鳴相當游魚躍波側耳聽五絃  
仰秣思騰驤個中希聲誰曉會伯牙志在千山外一似  
仙人蓬島歸雲路大風響環珮琴中之樂樂孔多琴中  
之趣當如何琴調能使妻子合琴調能使君臣和琴兮



琴方有深意三尺枯桐托交契龍唇鳳沼有佳名玉軫  
金徽富精緻君不見大舜彈五絃又不見孔子操杏壇  
大哉聖人去已久天風漠漠難爲攀方今  
聖德闢光耀九重屢下求賢詔正當勢此造金門律應  
簫韶入廊廟

草書歌

胡廣

妙筆好仍好文伊誰之能趙將軍精誠皎潔懸白日  
浩氣磊落橫青雲從仗劍事

明主帳下賢勞忘辛苦據鞍草檄人共知破敵塞旗心  
自許只今海宇歌太平待從 彤墀承穆清朝罷臨池  
恣揮洒筆陣飄逸令人驚勢如激電起倏忽又似秋空  
騰健鶻恍疑危石墮顛崖欵若潛蛟躍溟渤神情冲澹  
更蕭散何用公孫舞經眼昔時浪誇金錯刀此際須爲  
鐵門限坐令索者走如市積軸盈箱更盈几毫端變化  
不可測頃刻煙雲生滿紙蹇予亦有好奇癖學久無成  
徒嘆息請公爲我寫數張毋使高堂空素壁

聽老人說彈琴歌

道傍老人年八十向人欲語先於悒手携古琴紫錦囊  
朱絲作絃金徽光湘江孤桐裁霹靂聲函萬籟藏宮商  
自言少小初學鼓傳得張郎雙鳳譜有時抱向月中彈  
風露滿天秋鶴舞大聲冷冷響泉小聲幽幽作私語  
傍人欲聞不可得除是知音乃相許只今頭白兩目昏  
十指無力耳不聞雅韻都忘清絕意多情恨殺卓文君  
壯心已矣空長嘆往事淒涼成漫漶燈前却憶雉朝飛  
夢裏猶思廣陵散我聞翁言良可悲人生有盛還有衰  
蒼茫流水高山趣末路悠悠皆爾爲



大魯生歌

錢宰

才莫學商與申謀莫學儀與秦聖人龍飛起霄漢君子  
豹變乘風雲正堪下士養純素坐看四海風俗淳君不  
見韓非作說難西游入函關孤憤五蠹信奇險身亦不  
能免於患君不見酈生事豪俠東遊下齊城卿孟馮軾  
騁雄略終以賣已遭其烹所以大魯生游心極玄古大  
道真探造化先淳風不離元氣母漢陰抱甕真與倫惠  
施據梧堪作五達人侗儻笑爾愚智士縱橫嗟我魯豈  
知愚魯本天真渾沌鑿竅真何補大魯生夫奚爲孔門  
弟子三千七十二參也竟以魯得之

天遊方丈歌

子好遊乎吾語子遊子好遊乎吾語子遊魯連抗節東  
海馭倜儻有策輕王侯地遊邯鄲救全趙秦兵解圍不

得留彎弓射書困燕士猛將吞聲甘斫頭笑揮千金賤  
封爵但令四海奇其謀馬遷有才生龍門逸氣磅礴橫  
乾坤南遊江淮恣奇覽江水萬里來我岷會稽神書封  
禹穴金匱石室赤手捫尚南留滯何足較青史萬古雄  
其文雄文錯落紛天章上與斗星爭光芒奇謀偉略驚  
世人風霆變化森開張吁嗟奇士不復見龍門之下已  
黃土東海之水今成桑文亦不能騁其氣謀亦不能施  
其長功名事業竟何益壯遊之迹成荒唐不如學仙子  
一氣凌紫霞尸居在巖穴天遊邈無涯朝登泰山望滄  
海手披扶桑食日華夕休華岳澗西極笑吁金精牽若  
菟閬風瑤島何清淺崆峒具茨非杳冥倦游歸向山中  
室方丈彷彿如蓬瀛廣成子安期生與商逍遙大霞表  
一洗人間萬古情



白紵歌

胡儼

昨日之日不可留飛光迅速如波流嗟嗟少壯終白頭  
 願及芳時往遨遊吳姬當筵歌白紵清絲急管聞宮呂  
 妙舞低回玉盃舉如何不樂空延佇堂前花開艷春陽  
 錦屏圍暖羅綺香燭鍾考鼓宴高張美人起舞舞紅袖揚  
 海堂欣欣樂未央但恐一夕秋風涼空自徘徊明月光  
 奉 教園獵擒虎歌 楊士奇

山頭園獵日將午猛士如林盡貌虎凌雲銅角一聲落  
 馳馬爭前捷飛羽草間咆哮誰敢撻赤手縛之如縛鼠  
 狎 耽耽目如炬猶激陰風動率楚生擒青虎直百獸  
 尤乃殺獲連四五睿情所重揚威武奏凱歸營壘笳鼓  
 出村羔豚散不收掃除民愚民無憂懼呼仰荷  
 儲皇賜道傍拜舞歌千秋

鳳凰臺歌送貢士張子深

時李昭

黃河一千年一清鳳凰一千年一鳴

大明龍飛御寰宇河清鳳鳴天下平亭亭鳳凰臺我我

壯

神京九苞集其上四聞鏘有聲獻圖舞

丹陛啣 詔下青冥張郎吏書鳳城去繫馬鳳凰臺下

樹登臨此自聽和鳴五色文章散雲霧短檠十載勞提

携春風試上青云梯淒涼鴈塔已蕪沒好把姓名堂上

題

浮亭月下聞李大秦箏歌

高柄

孤館夜寂寞秦聲轉淒然醉來聞向明月下客心搖落  
 秋風前飄飄十指聲猶訴颯颯長林驟飛雨激若荊州  
 易水歌悲如蘇子河梁語角羽初停又拂商四郊黃葉



紛飛揚劍門滴盡邊人淚鏡閣啼殘少婦腸西江曾臨  
吹玉笛馬上淒涼聽不得祇今彈得心欲狂四座相看  
失顏色伶倫去後空有思世上秦聲誰得知偏同客裏  
歌楊柳長伴軍中舞馬兒轆轤金井梧桐冷壯士衣寒  
心耿耿一盃何處醉平原酒盡浮亭不堪醒

白雲茅屋歌為宋訥祭酒賦 趙梅

名藩舊說天雄軍滑邑山川天下聞鐘靈毓秀自今古  
瑞氣長年成白雲山中仙人羨如玉蚤向雲間結茅屋  
素心直欲友鸞鳳雅志寧甘伴麋鹿茅屋數椽臨碧溪  
濛濛常見白雲棲泉聲落澗尋常聽山色當門咫尺迷  
多如玉葉飄瓊樹輕似東風落春絮巖前鶴過杳難分  
檻外鶯啼不知處仙人讀書茅屋中文光夜吐如晴虹  
露魚碎去芸香藹汗簡濕來嵐氣濃一自從龍上京國

目接蓬萊雲五色視草綉過白玉堂趨朝曉註金門籍  
簡在

宸衷寵渥深蕭蕭白髮已盈簪囊中鸞錦舊頒誥篋內  
馬蹄新賜金官陟司成居壁水師道尊嚴孰能比四方  
學士被文風六館諸生沾化雨為雨為霖信不虛聲名  
燁燁滿寰區他年定遂懸車志光貫當時舊隱居

福祿歌

番人呼為福俚至此改曰福祿狀如  
騾其文白黑相錯勻瑩爭紫可觀

李時勉

奇獸生來毛骨殊不與凡類同馳驅玄章素質粲雲錦  
霜蹄綉尾踰龍駒祥物尋常懷猛氣倏忽應須爾千里  
五花連錢難可同王驄赤驃寧堪擬嘶蹴踏長風生  
朝刷溟海波濤驚崑岡疊蒼壁萃雪嶺片片玄雲凝  
駑駘跼蹐弗敢顧廣達大道騁獨步肯從僻壤困奇材



欲向天衢駕鑿輅五雲城闕宮殿開九陌喧傳福祿來  
玉階立迹榮光繞彤墀行逐祥煙迴漢庭龍馬曾入貢  
一時驚喜誇歌頌若教覩此奇異姿寧遣清名渥注重

鏡川山居圖歌為友人應志和賦 黃淮

鏡川之山高插天雲開疊嶂含青蓮鏡川之水流寒玉  
風颺晴波散文敷川迴路轉林木叢浮嵐暖翠千萬重  
中有丹山煉丹井相傳自昔居葛洪仙翁一去渺無迹  
夜夜丹光照泉石雲深芝草有餘香洞口桃花自春色  
春風吹花逐水流何處漁郎來放舟隔岸人家分遠近  
服田力穡宜有秋其中風景多佳致草堂更在雲深處  
書聲徹夜猿鶴驚珠玉蘊藏山水媚知君積學力有餘  
攬竒擷秀昌厥辭拄笏吟看山色好援琴坐愛松月遲  
方今致治崇儒術君當薦薦飛騰日傍人莫笑北山移

良材只為

明時出

捕魚圖歌

吳棹

官河雨後春水渾夾河兩岸皆魚村捕魚但願魚課足  
風波雖險寧復論大魚無多趁時賣小魚連船賤如芥  
大魚賣錢須納官小魚得錢還酒債魚郎捕魚莫厭貧  
官河魚來朝朝新勸郎莫厭魚業賤古來亦有非常人

愛竹軒歌

君家種竹不知數春筍生時塞行路鳳尾雛披拂曉煙  
龍角參差出寒霧薰風五月新雨晴載酒日日尋幽盟  
涼陰萬壑漱寒玉清籟滿空吹紫笙嗟君於此鍾愛久  
白髮相看勝賓友噴飯能容太守饒哦詩欲繼淇園後  
我曾看竹來林下高擁紅酣卧深夜風雷倏忽破層崖  
知是當年老龍化



南臯歌

邑南佳趣人罕知處士得之心自怡草堂邀我酌新酒  
索我為賦南臯詩我登南臯嘗頓足自說南臯勝盤谷  
山色長留萬古清水聲寒瀉雙溪玉東風昨夜新雨晴  
隔林幽鳥鳴嚶嚶書聲未輟曉牕讀負耒復課兒童耕  
南臯人家若城市南臯風景清如水每著青衫坐綠苔  
何須秋佩紉蘭芷我遊南臯已十春日與處士情相親  
浩歌不覺成放浪掉臂直欲超凡塵

薤露歌

胡奎

薤上露何離離人生不滿百歡樂當及時東方三足鳥  
啼老扶桑枝古來聖與賢一去無還期薤上露令人悲

天廐神馬歌

曾棨

天廐神馬不易得鳳臆龍髻秋兔色圍官廐養千載餘

云昔來自朝鮮國想當此馬初生時蛟龍降精雷雨垂  
房星夜墜水盡赤雲霧下繞靈風吹雄姿逸態真神駿  
足踠蹄高雙耳峻目光夾鏡昞方瞳汗血流珠膩紅暈  
朝鮮得此不敢騎覆以黃毡獻赤墀迺知天廐盡龍種  
如此萬死皆權奇今晨韞出迥殊絕扈從鑿輿自超越  
朝趨遠跡交河冰夕抹驕嘶薊城月君不見驂騶肅霜  
古亦多老不一試將奈何駑駘無力枉蹠蹠俗馬有肉  
空嗟我平生憐爾獨遭遇綉勒金鞍照瓊署相期慎保  
不凡姿萬里常隨六龍馭

銅爵凡硯歌

征西將軍蓋世雄睥睨漢鼎驕成切建安天子在掌握  
車駕又從輶轅東策勲定策分茅土赤舄煌煌輝袞黼  
鑄成銅爵起高臺繡戶珠房貯歌舞繁絃急管鳴未終



葛汁啖盡金尊空分香賣履恩愛畢西陵落日生悲風  
三方鼎峙霸圖息玉輦金輿已陳迹冷雨寒煙滿鄴中  
惟見銅駝卧荆棘誰憐地老天亦荒宮瓦散落猶深藏  
千年劫火煉不化至今出土生輝光草根藤繞苔蘚蝕  
鄴中野人初未識臨江太守忻得之此物不應同瓦礫  
殷勤拂拭重磨礱制作豈讓端川工鳳池先生真尚古  
寶此乃與瓊瑰同先生自昔稱才俊忽見珍竒豁方寸  
龍香麝臍益光妍玉璽金輝發清潤翻思淪沒塵土鄉  
此日還登君子堂竒姿曾識奸雄面清玩宜親翰墨塲  
君不見漢家諸陵在荒野王魚金盃無遺者早悟愚民  
盜一坏不如燒作鴛鴦瓦

望嶽歌

我欲登泰山憑高望八極浪迹二十年蹉跎竟難得今

晨馬上忽見之屹立東南半空碧想當鴻荒時二氣相  
鬱蟠大塊戲其上莫能識其端圓靈降崖萼坤后孕峯  
巒一朝天地劃開闢但見千丈萬丈高嶺屹乃知造化  
神設此奠坤軸巨靈枕其顛六鰲戴其足總公不能移  
長房不能縮天工經營鬼斧鑿削出千數百峯青玉立  
自從上古來南風吹不平日月吐華彩星宿揚光晶寒  
崖積冰雪陰壑駭風霆雲霞炫明晦草木發晶英上浮  
金銀氣下潛魑魅形巖巖魯所瞻作鎮朝百靈秦皇漢  
武巡遊遍王檢金函重封禪風雨莓苔往日碑煙雲松  
栢當時殿由來五嶽秩三公况爾巨鎮山之宗鍾靈毓  
秀杳莫測磅礴下土專其雄我

皇御天生有聖德廣彰仁化誕布恩澤一舉平安南再  
舉清漠北車駕時巡過泰山望祭築壇呈玉帛小臣幸



此奉

宸遊一覽茲山愛山色雖無消埃補河嶽頗有詞氣填  
胃憶他年載筆頌神功刻盡泰山山上石

薊門老婦歌

薊門老婦歌且行一曲斷腸多苦聲時時掩面向人泣  
泣罷從前道姓名自言少小顏如玉金縷羅襦關東  
先朝丞相重清歌教得新翻太平曲離房繡闥高送我  
五侯七貴時經過就中艷色自無數低首低鬟聽我歌  
行雲斷絕梁塵起滿座傳盃驚且喜嘗筵一擲千黃金  
翻惡管絃徒聒耳只言歡樂度青春不識入閒賤與貧  
向來風景一朝異翠鈿散落墮埃塵况今衰老轉蕭索  
惟有茅廬傍西郭閑來猶唱舊時歌不覺一聲雙淚落  
人生豈得長少年一貧一富皆自然銅山鑄錢終餓死

古往今來何足怜

隴上歌

張珍

虎士數聞人馬飢棄城遂脫劉曜圍南追勁騎疾欲飛  
大刀蛇矛還奮揮旌旗搖搖落日微黃塵蔽天無光輝  
短兵三接畏軍威力盡戰血染征衣士卒十萬失所依  
念君撫勞將誰歸

畫虎圖歌

王英

趙生畫虎世所無今日始得觀此圖空山蕭條百草枯  
天寒一虎怒且呼雙睛欲搖電光赤牙如利刀爪如戟  
揚威吐舌意自雄長風吹山撼危石山中百獸皆悲鳴  
但恐飢餓相吞并林深藜藿誰敢採谷靜白晝無人行  
誰能彎弓挾強矢為我一發令虎死殞傷生意雖可怜  
祛剪暴物人皆喜嗟哉暴物古亦多貪吏如虎嚴且苛



從來網羅不能盡細觀此圖將奈何

湖山佳趣歌

李禎

半生甘作隱者流兩屐不到侯門遊老去高情付林壑  
閑來樂事只漁舟春水泛花漾孤嶼杜衡蘼蕪滿脩渚  
晴樹遠連江上村晚雲忽作溪南雨自憐身世兩悠悠  
濯纓濯足忘吾憂萬鍾懸爵本非志一竿在手何所求  
門前學種五株柳逸興雅懷到處有對客石床撫古琴  
留客山瓢斟濁酒年年歲歲適閑情皞皞熙熙度此生  
已無天上鵝鸞夢且結湖邊鷗鷺盟

梅隱歌為蕭醫士作

曾道羅浮仙夜訪蕭史臺臺前幾株樹粲若瓊瑤開粉  
面嫂婷淡梳洗消消綠萼嬌相倚龍宮舞女白霓裳解  
珮招邀月明裏須臾晴雪洒石闌長風不惜輕吹殘

芳忽遇蕭史裔幽情雅致真難攀笏皮裁冠紙裁帳惟  
耽嘉遯無官况飲冰寄傲寒香中憂患何緣到心上巡  
簷行歌貪看花尋常每至參橫斜軒裳夢斷任身懶山  
水情多從鬢華縱令對酒吟東閣爭似扶筇探西郭第  
能曾並濟川舟效用終慚活人藥活人應多功已深年  
年著子滿高林陽回一氣得春信生生熟識堪興心調  
羹事非成契闊回思故園渺天末獨餘酸味今尚存謾  
道能除世間渴

雪蓬散人草書歌

林鴻

雪蓬散人有嫵裔翰墨游心與神契摹臨秘帖追晉風  
揮洒雄文明古制單門鐵限人爭求荒郊瘞筆應成立  
媼媚雲霞晴變態傾斜風雨寒颼颼伊余與君共鄉縣  
結交自昔忘貧賤銜杯落拓膽氣豪江樓塾寺書題徧



借問君書初若何君言妙悟應聞歌諧音本自車振鐸  
渙汗有類風行波乃知至理無不寓要在高人會其趣  
古來入室惟逸少後者升堂有懷素當代如君誠亦稀  
莫嘆蹉跎一布衣有錢沽酒與君飲醉卧目送孤鴻飛

月夜聞李生彈箏歌

越客本浩蕩秦箏何激揚浮亭子夜月色古一曲萬籟  
鳴清商初聞楚調聲激烈志士報讎思飲血再聞宮音  
如扣鐘魯生指讓顏雍容清和變調有如此俠客聞之  
心欲死銀甲彈來更嫣然金魚脫却渾輕爾吾聞錦瑟  
五十絃湘靈夜鼓聲淒然遂令帝子剖其半遺音尚有  
秦人傳秦聲楚調音雖異今古猶來共一致燕市誰知  
擊筑心吳門孰識吹簫意今夜聞君鼓曲聲百杯不醉  
壯心橫衆賓枕藉秋衾冷獨倚高梧望月明

秋夜聽谷大彈陽春白雪遂歌以贈黃玄

聞有歌白雪未能覩絃聲看君彈來秋月下十指如度  
春風鳴初聞飄飄下大闕亂逐迴風氣騷屑凍來深樹  
梅不開散入空林竹應折又如紛紛江上來流音中節  
渾相催灞陵一日幾人度剡溪半夜孤舟迴清光帶寒  
流野鳥絕繁語少女歌殘葉共飛仙郎唱罷花能舞須  
臾雲晴風亦遲按絃問君君不知聲殘響絕無所見唯  
見桐枝秋露垂

隔谷歌

王懌

兄羈囚弟露宿兄弟本連枝誰令隔山谷兄受飢寒日  
困辱弟欲救之力不足力不足可奈何願作高飛鴻銜  
之出網羅

李將軍歌



妖芒掃空流電紅將軍飛出麒麟宮帳士嬌獐敢哮虎  
羲和倒泣煙彌濛蓮花古劍腥銅氣番子番孫手中死  
赤血淋漓疑冷死塞土千年為君紫

漁樵問答歌

梁昇

字致堯番禺人號草堂

漁翁繫船清溪濱樵夫息擔臨水瀕欣然抵掌坐磐石  
苦樂何妨同討論漁翁問樵良所苦暮去朝來冒風雨  
層巒絕壁難躋攀幽徑荒林足豺虎何如一葉隨中流  
風清月白涼颼颼瓦甌蓬底動春酌去去來來良自由  
樵夫答云隨所願雨笠煙蓑足貧賤曉來腰斧入寒林  
晚出舒遲忘近遠行行且誦復高歌暮去朝來樂更多  
擔柴入市換春酒醉來和月眠煙莎樵夫復問漁翁苦  
窄窄孤蓬安所處風濤日夕相喧逐短棹長篙何以禦  
何如林下長嬉遊或新或舊春秋時來即作會稽守

命薄從教空白頭漁翁答云予所樂蓼岸蘋洲隨意泊  
女兒浦口日初長新婦磯頭潮未落勣勣一枕蓬底眠  
醒來猶在蘆花邊人閒若訪玄真子何異隨流覓水仙  
兩言問答皆云爾苦樂半忘彼此相携一笑暮雲橫  
坎寓流行隨所止

漁陽老婦歌

周忱

漁陽老婦白髮多去年歸自幹難河自言本是田家女  
少重姿容眾推許父母求婚來大都朱門許嫁不須臾  
良秋系出蒙古部阿翁仕元作樞副當時誤信媒妁言  
論財竟作偏房婦含羞俛首半載餘天上兵來北擊胡  
百口倉皇夜出塞散入匈奴部落居偷生強欲隨風土  
旂綰盤頭學胡語區脫沙中逐并泉琵琶馬上調歌舞  
豈無肉食充黃梁亦有酥酪為酒漿族類不同天性異



觸物時時懷故鄉况當夫死子尚幼風沙易得紅顏醜  
婦心一片竟誰知絕漠窮荒零落久前年天子親北征  
單于納款煙塵清往來信使無虛月老身遂得離邊庭  
提攜二子到鄉邑村墟改變無親戚吞悲暗憶別家時  
別時十七今七十角尖高帽窄衣裳半臂珠絡紅纓長  
兒童乍見皆掩笑元季都人同此粧今日官家有恩例  
給與牛羊賜田地太平衣食足耕桑且保白骨埋漁陽  
獨惜生來命何薄虛擲春光向沙漠寄語鄰家窈窕娘  
早嫁無如故鄉樂

聽琴歌為錢唐陳景中賦

黎充輝

嶧陽桐孫龍尾焦岱壓雪鬣冰弦調簾旌漾波虛室白  
屏山裊篆清芬飄正襟匡坐烏皮几宣父文王嚴臨際  
試聽悠悠大雅音一洗人間箏笛耳猗蘭土感龜山氛

梅花遠寄江南春盤空孤鶴唳霜月出海老龍吟水雲  
揚揚晴空柳絮亂溶溶春水桃花帳半夜驚濤立海門  
三秋幽泉寫松澗泰山倚空忽噴岘洞庭際天何渺漫  
楚姬垓下劍血碧漢女塞上笳月寒由来古聲傳古意  
彈之實難聽不易伯牙深賞鍾期心雍門亦墮田文淚  
方今繼明昭重離幸君共際重華時百獸率舞鳳來儀  
宮中方奏南風詩

具慶堂歌為孫指揮繼宗作

藺從善

鄒城山川壯且雄滿城佳氣何葱葱世家孫氏流慶  
澤鍾靈毓貴非凡庸

聖后尊安母天下姪姒與同覃德化二親偕老受褒封  
爵秩榮居上公亞樂哉二親壽且康庖眉鶴髮生輝光  
諸郎亶亶敦孝道締構新成具慶堂有時升堂戲綵服



有時獻壽稱霞觴親顏怡悅子心喜豈但殷勤奉甘旨  
聖主深加寵賚優恩榮富貴真無比我登具慶堂為賦  
具慶歌願言二親壽更比錢鏗多諸郎相祝齊拜舞二  
親之樂當如何具慶堂高嵯我親慈子孝芳名千載永  
不磨

古琴歌

張一民

我有一鳴琴中含太古音白玉作軫徽黃金久之不作  
鸞鳳吟龍紋斷漆光彩沈朱絃零落傷我心豈無異  
八規絲製作新絃更張之一彈再彈出乃奇臨風亦足  
一歡款

平胡歌

周敘

皇明一統御華夷四方萬國皆來歸東漸溟海西月氏  
北服左衽南雕題

列聖相傳勞撫治深仁厚澤同軒羲當今

天子神武姿嗣承大業勤萬幾宵衣旰食恒孜孜廟堂  
密勿多論思殘胡之運久已衰狐鼠伏猶猖披爰從  
宸隙振武威六龍整駕迷邊陲訓飭將士嚴防隄遠禦  
寇安群黎金征煌煌天日輝龍旂犀甲光陸離石門  
關城高險巖涼秋九月親駐師遽聞醜虜來南窺獸逸  
豕突交奔馳

天顏震怒天戈揮神謀獨運如化機躬率鐵騎奮若飛  
自天而下人莫知王旅嘽嘽虎與貔協心戮力爭窮追  
雷轟電掣孰敢反斬馘虜首紛纍纍縛其酋王宥老羸  
直擣巢穴無子遺牛羊初出馬正肥輜重委積如山坻  
盡驅入塞盈路岐邊烽永息蘇民疾腥膻滂滌良在茲  
彙弓服矢不服施班師振旅還京畿翠華拂天揚鼓鼙



霓旌鳳蓋張琴麗駢闐夾道奔拳倪謳歌鼓舞成豐治  
告功郊廟誠巍巍神明錫貺臻蕃禧憶昔周宣中興時  
北逐獫狁垂聲詩

聖皇用武何神奇豐功駿烈真過之小臣史館職文詞  
亦依日月露恩私作詩稽首獻赤墀上祝

聖壽天與齊八荒四海陶雍熙

古劍歌為胡中書宗蘊賦

良工冶鑄金鐵英鍊出寶劍真天成燁若芙蓉吐新豔  
瑩如綠水含秋清一從中道沈埋久紫氣猶能貫牛斗  
試尋夜夜想飛騰匣裏時時覺悲乳君今得此何大奇  
鶉膏拂拭光陸離防身震懾魑魅膽露鍔荆蘭霜雪姿  
由來靈物祗呵護願子殷勤重垂顧莫教佩服過延津  
只恐跳波化龍去

新秋喜晴歌

胡濟

西風夜號梧葉飄陰霾滅沒潢潦消陽光動地瑞成彩  
顥氣澄空虹作橋四方河岳多佳麗萬國衣冠沐光霽  
從此時和歲有登謳歌共樂清平世

祖龍歌

釋宗勅

祖龍迺好長生者沈壁走來華山下目斷樓船海氣昏  
鮑車亂臭沙丘野驪山山錮三泉開泉頭宮殿仍崔嵬  
當時輸作方壘壘函谷無關小龍死百萬降旗軹道傍  
十二金人淚如水

姑蘇臺歌

姑蘇臺上麋鹿遊吳江水映西山秋館娃宮樹迥不見  
落日荷花今古愁向來豪客層樓擗醉擁吳姬夜歌舞  
齊雲易逐浮雲飛鬼火三更照寒雨



于雪莊画歲寒三友圖歌

錙師邵

雪莊老人十餘神清貌古心晏如平生寫梅入神品  
直與造化論鎡銖酒酣興發岸高幘老翰嶙峋漬濃墨  
須臾筆底春風生萬蕊千葩開頃刻聞將新意繪古松  
角爪天矯蟠蒼龍徂徠恍惚若在眼聲拂眾壑迴清風  
比來画竹更奇絕遠自湖州得真訣咄哉此圖三物俱  
豪素經營恣塗抹達人玩物情所存陽和歲晚回孤根  
貞姿勁節比交誼世態悠悠何足論昨將展向高堂掛  
不謂遙看是圖畫他年藝莫如見求寧惜千金售高價

五馬圖歌

渥洼水中產龍馬房星之精自天下星奔電掣勢莫當  
豈比尋常駕轅者竹批峻耳鐵作蹄雄姿颯沓精權奇  
日行三萬等歷塊未許八駿相追隨今觀此圖凡五匹

画史經營各臻極就中一匹是真龍異質殊形人莫識  
滄溟气含雲霧涼蹴齧顧盼忠騰驤神奇變化在頃刻  
素壁高懸安可常

古劍歌

石匣緘塵鎖秋水白花寒凝鷓鴣髓神光夜燭鬼魅愁  
躍入玄潭老蛟死雙嬰恨血流電紅赭爐怨魄收神功  
吳宮鬼火埋古銅古蟾弔影煙濛濛

和王維夷門歌

張楷

秦兵西來三晉分倉卒誰解平原紛邯鄲居民若坐甑  
大梁公子思要君羨羸有志如老馬決策豈居廉藺下  
終成挾七報襄人不是持圖刺秦者兵符入手遂羸謀  
公子懷恩無處酬抱關夷門豈無士慷慨似公真罕求  
和岑參輪臺歌送封大夫出師西征



旄頭高高露芒角  
輪臺夜夜寒光落  
天子下詔恤黔黎  
將軍奉命來安西  
大營殺氣連天黑  
胡兒潛遁金山北  
營中傳令莫窮征  
整頓班行自在行  
北風刮地黃沙湧  
角聲一呼大軍動  
四邊遊兵星霧屯  
中央一旗爲本根  
橫欄直衝鉤帶闊  
胡如冒兔不得脫  
料知此行多苦辛  
須憑一舉息胡塵  
他時功成奏天子  
無愧麒麟閣上人

和岑參范公蓂竹歌

春葩外媚人爭愛  
豈知愛竹能資內  
解傲冰霜節本堅  
能吹律呂才還大  
雲梢舞風夏且寒  
露葉隱日朝還乾  
縱令委翳荆榛下  
寧作尋常花草看  
君今移種才幾日  
屋頭便見林森出  
列坐且爲君子交  
裁筒莫作春秋筆  
豈不見柯亭山下  
青青枝幾年寒暑  
任推移大材貞節  
待自抱不遇中郎  
人不知

和岑參邯鄲客舍歌

朝別鄴中人暮走邯鄲道  
客舍門半開荒城莽秋草  
高酒旗臨水邊綠楊送盡去  
來舡夜深妻子笑且語  
一日座閒收百錢燈下唱歌復飲月  
過牆西猶未眠

山水歌爲四明錢宗魯題

白雲孤還青山四起丹丘玄圃空  
濛裏海天茫茫不見底  
疊翠重嵐幾千里溪上茅亭松樹傍  
野陰拍地生空香山翁任情坐  
忘返宛如嚴陵罷釣秋江晚  
望裏孤舟夕照闌又如子猷獨棹  
雪中還目疑心想不可得野水  
蕭蕭暝無色亦欲揚帆逝急流  
只恐滄浪渺難測

慈谿馮節婦歌

馮家節婦潘家女二十從夫夫即死  
誓言永保百年身至死不爲他姓鬼  
深閨獨掩春晝闌豈知門外春花殘

楊軾餘姚人



曉鏡埋塵月光掩夜機織雨秋聲寒夫隔重泉兒在腹  
兒生漸喜書能讀買書不惜鸞釵金待客曾分鬢雲綠  
兒今作宦孫成行阿母年高雙鬢蒼一生苦節何所似  
冰壺月鏡爭輝光我今作歌歌苦節聲逐清風何激烈  
繡衣使節來觀風定應採獻  
黃金闕

凱歌十首

立澹

紅日中天萬國明戴盆魑魅尚偷生  
神機曆略如天運一怒能教嶺嶠平  
三軍奮勇氣橫秋石裂煙消水不流一夜山靈驚失險  
回頭不見九層樓  
萬出轟轟石層層千仞穹崖百尺藤朝野傳聞總驚  
訝將軍真是解飛騰

捷音曉日奏

龍墀

聖主當軒亦解頤借問古人誰得似漢家充國宋家琦  
山韓未足謂奇勛此日都輸馬服君怪得成功如反掌  
元戎能武又能文

今日軍中又一韓功成只在笑談閒由來名下無虛士  
從此威聲振百蠻

水陸舟車處處通三軍飽食不妨農相逢盡道兵威壯  
誰識蕭何轉運功

十年坐待虺成蛇骨滿空山草滿家一陣凱風吹地動  
荊榛轉眼即桑麻

千載嶄巖一日平山無瘡癘鬼無靈紀切片石那能盡  
兩廣蒼生口是銘

此捷今無古未聞兩階舞羽待回軍尚方舊鑄封侯印



史館新書靖遠勳

同前題八首

夏時正

和人大  
聖寺卿

十萬雄師下九天  
摧鋒破敵更無前  
掃清嵐霧風隨馬  
射落旄頭月應弦

指麾肅肅靖轅門  
至計如神不可論  
大將曉猶屯細柳  
偏師夜已奪崑崙

捷報時時奏羽書  
烝民戰後樂耕魚  
萬方和會歸王會  
不復通言用象胥

貔虎桓桓十萬兵  
風霆震蕩不流行  
一時掃盡千山瘴  
更借甘霖為洗兵

樓船笳鼓送回軍  
壯氣驕騰拂曉雲  
便擬麒麟寫生面  
更從彝鼎勒奇勳

羽扇綸巾有雅容  
輕裘緩帶也雍雍  
等閑了却平蠻事

拾取通侯萬戶封

龍飛淮甸馭群雄  
開

國元勳盡上公  
唯有西平好孫子  
擊鵝破蔡取奇功  
剪滅妖氛若燎毛  
謀深不用虎龍韜  
封侯取印君家物

請看先公舊戰袍

次凱歌韻十首

張瑄

天遣賢才翊

聖明二三豪傑應  
期生要令夷夏歸  
熙皞嶧海區區不  
足平殺氣淒然稟  
若秋積尸和血  
蔽江流賊中情偽  
常先得不待籌邊  
百尺樓

丹崖萬仞石稜層  
到處夷巢復斷藤  
露布未曾呈草稿  
捷音都下已喧騰

中丞銜



命出 龍墀五莞呻吟漸解頤報到蠻酋相戒飭六軍  
都統是韓琦

大將推誠集大勛盜符恥效信陵君共誇今日平蠻策  
不數相如喻蜀文

斷藤峽似隔二韓夷獠檜巢縹緲閒一日  
天兵焚蕩盡因應不戰警諸蠻

水陸閒關轉運通多方區畫不妨農試將漢史從頭讀  
只有蕭何第一功

山無豺虎道無蛇犴獠相參百姓家昔日高原皆灌莽  
如今多半藝桑麻

大藤已斷峽山平遠仗  
天威荷 寵靈不用饒歌歌盛羨紀功自有太常銘  
聖主臨軒捷上聞便輸內帑勞三軍命圭相印金書券

先冊平蠻第一勛

次凱歌韻十首

夏埴 天台人廣  
東布政

星斗光寒劔戟明猩鼯無地可逃生峽山自昔如天險  
周道從今似砥平

蔽野旌旗鼓角秋將軍元是伏波流自緣威令風霜肅  
消盡蛟涎與蜃穢

直上危峯幾百層長刀斫斷萬年藤一時氣燄掀天地  
雲淨煙消川沸騰

幾多俘馘獻 丹墀中外喧傳笑脫頤只恐史官書不  
盡神功又刻向貞琦

不是貪他蓋世勛一心只欲報  
明君牙旗兩月臨遐嶠使見平蠻露布文  
籠霄卷霧古稱韓况與安陽伯仲閒共待為霖遍天下



軍功豈獨震夷蠻

險險平夷塞塞通足兵足食嫌三農木牛流馬都休說  
記取當時轉運功

將軍袖裏有青蛇一躍能全百萬家不是封侯酬不得  
金書鐵券照黃麻

百怪千幽一削平西風長夜泣山靈歌謠萬口稱功德  
不數燕然舊勒銘

一曲饒歌遠近聞翩翩旌旆擁回軍也知黃閣論功處  
都讓征夷策上勛

次凱歌韻十首

馮定

東吳人按  
察副使

聖主臨朝日月明遠除邊患念蒼生三軍奮勇驅狐兔  
兩廣于今樂太平

肘懸金印氣橫秋大將名居第一流千里瘴煙都掃盡

傍山無復起層樓

山勢崔嵬幾百層藤藏妖怪樹遮藤一朝藤斷民安業  
瘴氣全消瑞氣騰

官軍振旅觀龍墀掛却雕弓暫捧頤共說古今賢將  
相誰如克國與韓琦

金刃白羽策功勛下為生靈上報  
君威武遠追唐李靖聲華不減宋希文

明朝將相宋朝韓文武威名伯仲閒誰謂當時服西夏  
難如今日定南蠻

寇平三廣路相通復業居人盡務農月滿柳營笳鼓歇  
羽林歌酒夜論功

將軍神劍本青蛇滅盡兇渠百萬家昨日  
九天沾寵渥鳳銜丹詔出黃麻



兩廣氛埃久未平一朝雷雨動山靈擒蠻若問功多少  
請看懸崖石上銘

半載功成世罕聞英雄真邁古將軍雲邊玉勒初回騎  
天上麟臺早策勛

次凱歌韻十首

王祐

上將金戈耀日明掃除炎瘴慰蒼生獻俘

北闕旋師旅按堵南人歌太平

秦凱班師得勝秋鳴笳橫梨泝中流賦成未獻

明光殿飛夢先朝五鳳樓

亂峯蠻寨起稜層蟻地參天有怪藤欲斷百圍誰上得

將軍龍馬解飛騰

星郵飛捷奏彤墀歡動

天顏笑滿頤標柱不須誇馬援安邊今復見韓琦

百戰誰當第一勛眾中不伐獨推君堂堂膽氣偏能武

落落才華更贍文

共說軍中有一韓坐驅西賊指揮閒功成未許留南越

聖慮應勞定百蠻

陰崖窮谷路齊通到處蠻徭盡務農不是司徒善安輯

請成良將靖邊功

旗翻似日動龍蛇歸騎翩翩指

帝家不獨秋霜剪荆棘還施春雨長桑麻

驟峽灰山一鼓平遠夷無不畏威靈後人欲問當時事

試看穹崖石上銘

談笑行師昔未聞秋毫無犯肅回軍雲臺擬續丹青筆

嶺海爭誇不世勛



文翰類選大成卷第九十

文翰類選大成卷第九十一行目錄

漢

古辭 八首

馬文淵 一首

魏

武帝 二首

文帝 二首

文帝甄皇后 一首

晉

曹子建 八首

阮元瑜 一首

傅休奕 三首

陸士衡 二十首

東

張駿 一首

謝靈運 七首

謝惠連 三首

顏延年 一首

鮑明遠 十首

孔欣 一首

荀昶 一首

釋孝休 一首

齊



梁

陸韓卿二首

王融一首

武帝一首

簡文帝一首

元帝一首

昭明太子一首

庾慎之二首

蕭子顯一首

戴嵩二首

江文通一首

劉孝威一首

劉孝勝一首

庾子山一首

何仲言一首

范靜妻沈氏一首

陳

顧齊馮一首

張正見一首

俊魏

高伯恭一首

後周

王褒一首

隋

盧思道一首

孔紹安一首

明餘慶一首

薛玄卿一首

文翰類選大成卷第九十一行目錄



文翰類選大成卷第九十一

左長史上海李伯璣編輯  
伴 讀慈谿馮 厚校正

行類

漢

飲馬長城窟行

古辭

青青河畔草  
絲絲思遠道  
遠道不可思  
宿昔夢見之  
夢見在我傍  
忽覺在他鄉  
他鄉各異縣  
展轉不相見  
枯桑知天風  
海水知天寒  
入門各自媚  
誰肯相為言  
客從遠方來  
遺我雙鯉魚  
呼童烹鯉魚  
中有尺素書  
書中竟何如  
上有加飡食  
下有長相思

君子行

君子防未然  
不處嫌疑間  
瓜田不納履  
李下不正冠  
嫂



叔不親授長幼不比肩勞謙得其柄和光甚獨難周公  
下白屋吐哺不及餐一沐三握髮後世稱聖賢

相逢行

相逢狹路閒道隘不容車不知何年少夾轂問君家君  
家誠易知易知復難忘黃金為君門白玉為君堂堂上  
置尊酒作使邯鄲倡中庭生桂樹華燈何煌煌兄弟兩  
三人中子為侍郎五日一來歸道上自生光黃金絡馬  
頭舊者盈道傍入門時左顧但見雙鴛鴦鴛鴦七十二  
羅列自成行音聲何雍雍鶴鳴東西廂大婦織綺羅中  
婦織流黃小婦無所為挾瑟上高堂丈人且安坐調絲  
方未央

善哉行

來日大難口燥唇乾今日相樂皆當喜歡經歷名山乏

草薿薿仙人王喬奉藥一丸自惜袖短內手知寒慙無  
靈輒以報趙宣月沒參橫北斗闌干親交在門飢不及  
食歡日尚少戚日苦多何以忘憂彈箏酒歌淮南八公  
要道不煩參駕六龍遊戲雲端

長歌行

青青園中葵朝露待日晞陽春布德澤萬物生光輝常  
恐秋節至焜黃華葉衰百川東到海何時復西歸少壯  
不努力老大徒傷悲

傷歌行

昭昭素明月暉光燭我牀憂人不能寐耿耿夜何長微  
風吹閨闈羅帷自飄颺攬衣曳長帶屣履下高堂東西  
何所之徘徊以彷徨春鳥翻南飛翩翩獨翱翔悲聲命  
儔匹哀鳴傷我腸感物懷所思泣涕忽霑裳佇立吐高



吟舒憤訴穹蒼

艷歌行二首

翩翩堂前燕冬藏夏來見兄弟兩三人流宕在他縣故  
衣誰當補新衣誰當綻賴得賢主人覽取為吾組夫婿  
從門來斜柯西北眇語卿且勿眇水清石自見石見何  
纍纍遠行不如歸南山石鬼鬼松柏何離離上枝拂青  
雲中心十數圍洛陽發中梁松樹竊自悲斧鋸截是松  
松樹東西推持作四輪車載至洛陽宮觀者莫不嘆問  
是何山材誰能刻鏤此公輸與魯班被之用丹漆薰用  
蘇合香本自南山松今為宮殿梁

武溪深行

馬文淵

滔滔武溪一何深鳥飛不度獸不敢臨嗟哉武溪兮多  
毒淫

魏

苦寒行 武帝

北上太行山艱哉何巍巍羊腸阪詰屈車輪為之摧樹  
木何蕭索北風聲正悲態熊對我蹲虎豹夾路啼谿谷  
少人民雪落何霏霏延頸長歎息遠行多所懷我心何  
怫鬱思欲一東歸水深橋梁絕中道正徘徊迷惑失故  
路薄暮無宿栖行行日已遠人馬同時饑擔囊行取薪  
斧冰持作麋悲彼東山詩悠悠使我哀

善哉行

自惜身薄祜夙賤罹孤苦既無三徙教不聞過庭語其  
窮如抽裂自以思所怙雖懷一介志是時其能與守窮  
者貧賤惋歡淚如雨泣涕於悲夫乞活安能覩我願於  
天窮琅邪傾側左雖欲竭忠誠欣公歸其楚快人由為



歎抱情不得敘顯行天教人誰知莫不緒我願何時隨  
此歎亦難處今我將何照於光曜釋銜不如雨

燕歌行 文帝

秋風蕭索天氣涼草木搖落露爲霜群鷺辭歸鵠南翔  
念君客遊多思腸慊慊思歸戀故鄉君何淹留寄他方  
賤妾莞莞守空房憂來思君不敢忘不覺淚下沾衣裳  
援瑟鳴弦發清商短歌微吟不能長明月皎皎照我牀  
星漢西流夜未央牽牛織女遙相望爾獨何辜限河梁

折楊柳行

西山一何高高高殊無極上有兩仙僮不飲亦不食與  
我一丸藥光耀有五色服藥四五日身體生羽翼輕舉  
乘浮雲倏忽行萬億流覽觀四海茫茫非所識彭祖稱  
七百悠悠安可原老聃適西戎于今竟不還王喬假虛

辭赤松垂空言達人識真偽愚夫好妄傳追念往古事  
憤憤千萬端百家多迂怪聖道我所觀

塘上行 文帝甄皇后

蒲生我池中其葉何離離傍能行仁義莫若妾自知衆  
口鑠黃金使君生別離念君去我時獨愁常苦悲想見  
君顏色感結傷心脾念君常苦悲夜夜不能寐莫以豪  
賢故棄捐素所愛莫以魚肉賤棄捐葱與薤莫以麻枲  
賤棄捐菅與蒹出亦復苦愁入亦復苦愁邊地多悲風  
樹木何脩脩從君致獨樂延年壽千秋

野田黃雀行二首

曹子建

置酒高殿上親交從我遊中廚辦豐膳烹羊宰肥牛秦  
箏何慷慨齊瑟和且柔陽阿奏奇舞京洛出名謳樂飲  
過三爵緩帶傾庶羞主稱千金壽賓奉萬年酬夕要不



可忘薄終義所尤謙謙君子德磬折欲何求驚風飄白日  
日光景馳西流盛時不可再百年忽我適生存華屋處  
零落歸山丘先民誰不死知命亦何憂

高樹多悲風海冰揚其波利劍不在掌結友何須多不  
見離間雀見鷓自投羅羅家得雀喜少年見雀悲拔劍  
捐羅網黃雀得飛飛飛摩蒼天來下謝少年

泰山梁甫行

八方各異氣千里殊風雨劇哉邊海民寄身於草墅妻  
子象禽獸行止依林阻柴門何蕭條狐兔翔我宇

怨詩行

明月照高樓流光正徘徊上有愁思婦悲歎有餘哀借  
問歎者誰自云客子妻夫行踰十載賤妾常獨棲念君  
過於渴思君劇於飢君爲高山桐妾爲濁水泥北風行

蕭蕭烈烈入吾耳心中念故人淚墮不能止沈浮各異  
路會合當何諧願作東北風吹我入君懷君懷常不開  
賤妾當何依恩情中道絕流止任東西我欲竟此曲此  
曲悲且長今日樂相樂別後莫相忘

惟漢行

太極定二儀清濁始以形三光炤八極天道甚著明爲  
人立君長欲以遂其生行仁章以瑞變故誠驕盈神高  
而聽卑報若響應聲明主敬細微三季膺天經二皇稱  
至化盛哉唐虞庭禹湯繼厥德周亦致太平在昔懷帝  
京日昊不敢寧濟濟在公朝萬載馳其名

升天行二首

乘蹻追術士遠之蓬萊山靈液飛素波蘭桂上參天玄  
豹遊其下翔鷗戲其顛乘風忽登舉彷彿見衆仙



扶桑之所出乃在朝陽谿中心陵蒼昊布葉蓋天涯日出登東幹既夕沒西枝願得紆陽轡迴日使東馳

怨歌行

為君既不易為臣良獨難忠信事不顯乃有見疑患周公佐成王金勝功不刊推心輔王室二叔反流言待罪居東國泣涕當留連皇靈大動變震雷風且寒拔樹偃秋稼天威不可干素服開金滕感悟求其端公曰事既顯成王乃哀歎吾欲竟此曲此曲悲且長今日樂相樂別後莫相忘

駕出北郭門行

阮元瑜 名瑀

駕出北郭門馬樊不肯馳下車步踟躕仰折枯楊枝顧聞丘林中噉噉有悲啼借門啼者出何為乃如斯親母舍我歿後母憎孤兒飢寒無衣食舉動鞭撻施骨消肌肉盡體若枯樹皮藏我空室中父還不能知上冢察故處存亡永別離親母何可見淚下聲正嘶棄我於此閒窮厄豈有貲傳告後代人以此為明規

晉

何當行

傅休奕

同聲自相應同心自相知外合不由中雖固中必離管鮑不世出結交安可為

惟漢行

危哉鴻門會沛公幾不還輕裝入人軍投身湯火間兩雄不俱立亞父見此權項莊奮劍起白刃何翩翩伯身雖為蔽事促不及旋張良懼坐側高祖變龍顏賴得樊將軍虎叱項王前頃目駭三軍磨牙咀豚肩空危讓霸王臨急吐奇言威凌萬乘主指顧回泰山神龍困鼎鑊



非曾豈能全狗屠登上將功業信不原健兒寔可慕腐  
儒安足歎

秋胡行

秋胡納令室三日官他鄉皎皎絜婦姿冷冷守空房燕  
婉不終夕別如參與商憂來猶四海易感難可防人言  
生日短愁者苦夜長百草揚春華攘腕採柔桑素手尋  
繁枝落葉不盈筐羅衣翳玉體回日流采章君子倦仕  
歸車馬如龍驤精誠馳萬里既至兩相忘行人悅今顏  
情息此樹傍誘以逢卿喻遂下黃金裝烈烈貞女忿言  
辭厲秋霜長驅及居室奉金升北堂母立呼婦來歡情  
樂未央秋胡見此婦惕然懷探湯負心豈不慙未誓非  
所望清濁必異源鳧鳳不並翔引身赴長流果哉潔婦  
腸彼夫既不淑此婦亦太剛

苦寒行

陸士衡

北遊幽朔城涼野多險艱俯入窮谷底仰陟高山盤疑  
冰結重礪積雪被長巒陰雲興巖側悲風鳴樹端不覩  
白日景但聞寒鳥嚙猛虎憑林嘯玄猿臨岸歎夕宿喬  
木下慘愴恒鮮歡渴飲堅冰漿饑待零露食離思固已  
矣寤寐莫與言劇哉行役人慊慊恒苦寒

從軍行

苦哉遠征人飄飄窮四遐南陟五嶺巔北戍長城阿谿  
谷深無底崇山鬱嵯峨奮臂攀喬木振迹涉流沙隆暑  
固已慘涼風嚴且苛夏條焦鮮藻寒冰結衝波胡馬如  
雲屯越旗亦星羅飛鋒無絕影鳴鏑自相和朝餐不免  
胃夕息常負戈苦哉遠征人拊心悲如何

燕歌行



四時代序逝不追寒風習習落葉飛蟋蟀在堂露盈墀  
念君遠遊恒苦悲君何緬然久不歸賤妾悠悠心無違  
白日既沒明燈輝夜禽赴林匹鳥棲雙鳴關關宿河湄  
憂來感物淚不晞非君之念思爲誰別日何早會來遲  
君子行

董逃行

和風習習薄林柔條布葉垂陰鳴鳩拂羽相尋倉鷓啮  
啮弄音感時悼逝傷心日月相追周旋萬里儻忽幾年

人皆冉冉西遷盛時一往不還慷慨乖念悽然昔爲少  
年無憂常怪秉燭夜遊翩翩宵征何求於今知此有由  
但爲老去年適盛固有衰不疑長夜冥冥無期何不驅  
馳及時聊樂永日自怡齋此遺情何之人生居世爲安  
豈若及時爲驪世道多故萬端憂慮分錯交顏老行及  
之長歎

順東西門行

出西門望天庭暘谷既虛崦嵫盈感朝露悲人生遊者  
若斯安得停桑樞戒蟋蟀鳴我今不樂歲律征迫未暮  
及時平置酒高堂宴友生激朗笛彈哀箏取樂今日盡  
歡情

鞠歌行

朝雲升應龍攀乘風遠遊騰雲端鼓鍾歇豈自歡急弦



高張思和輝時希值年夙愆循已雖易人知難王陽登  
貢公歡罕生既沒國子歎嗟千載豈虛言邈矣遠念情  
慨然

猛虎行

渴不飲盜泉水熱不息惡木陰惡木豈無枝志士多苦  
心整駕重時命扶策將遠尋飢食猛虎窟寒栖野雀林  
日歸功未建時往歲載陰崇雲臨岸駭鳴條隨風吟靜  
言幽谷仄長嘯高山岑急絃無懦響亮節難為音人生  
訪不易曷云開此衿眷我耿介懷俯仰愧古今

豫章行

汎舟清山者遙望高山陰川陸殊途軌懿親將遠尋三  
荆歡同株四鳥悲異林樂會良自古悼別豈獨今寄世  
將幾何日異無停陰前路既已多後塗隨年侵促促薄

暮景疊疊鮮克禁曷為復以茲曾是懷苦心遠節嬰物  
淺近情能不深行矣保嘉福景絕繼以音

飲馬長城窟行

驅馬陟陰山山高馬不前往問陰山候勁虜在燕然戎  
車無停軌旌旆屢徂遷仰憑積雪巖俯涉望冰川冬來  
秋未反去家邈以縣檢狃亮未夷征人豈徒旋末德爭  
先鳴凶器無兩全師克薄賞行軍沒微軀捐將遵甘陳  
迹收功單于旃振旅勞歸士受爵臺街傳

門有車馬客行

門有車馬客駕言發故鄉念君久不歸濡跡涉江湘投  
杖赴門塗攬衣不及裳撫膺攜客泣掩淚敘溫涼借問  
邦族閒惻愴論存亡親友多零落舊齒皆凋喪市朝互  
遷易城闕惑立荒墳壠日月多松柏鬱芒芒天道信崇



替人生安得長慷慨惟平生俛仰獨悲傷

長安有狹邪行

伊洛有岐路岐路交朱輪輕蓋承華景騰步躡飛塵鳴  
玉豈樸儒憑軾皆俊民烈心厲勁秋麗服鮮芳春余本  
倦游客豪彥多舊親傾蓋承芳訊欲鳴富及晨守一不  
足矜岐路良可遵規行無曠迹矩步豈逮人投足緒已  
爾四時不必循將遂殊塗軌要子同歸津

君子有所思行

命駕登北山延佇望城郭塵里一何盛街巷紛漠漠甲  
第崇高闥洞房結阿閣曲池何湛湛清川帶華薄邃宇  
列綺窓蘭室接羅幕淑貌色斯升哀音承顏作人生誠  
行邁容華隨年落善哉膏梁士營生與且博宴安消靈  
根醜毒不可恪無以肉食資取笑葵與藿

日出東南隅行

扶桑升朝暉照此高臺端高臺多妖麗濬房出清顏淑  
貌耀皎日惠心清且閑美日揚玉澤蛾眉象翠翰鮮膚  
一何潤秀色若可餐窈窕多容儀婉媚巧笑言暮春春  
服成粲粲綺與紈余奪垂藻翹瓊珮結瑤璠方駕揚清  
塵濯足洛水瀾藹藹風雲會佳人二何繁南崖充紅幕  
北渚盈軒軒清川含藻景高崖被華丹馥馥芳袖揮冷  
泠纖指彈悲歌吐清響雅舞播幽蘭丹唇含九秋妍迹  
陵七盤赴曲迅驚鴻蹈節如集鸞綺態隨顏變沈姿無  
乏源俯仰紛阿那顧步咸可懼遺芳結飛颺浮景映清  
湍冶容不足詠春游良可歎

齊謳行

營立負海曲沃野爽且平洪川控河濟崇山入高冥東



被姑尤側南界聊攝城海物錯萬類陸產尚千名孟諸  
吞楚夢百二倅秦京惟師恢東表桓后定周傾天道有  
迭代人道無夕盈鄙哉牛山歎未及至人情爽鳩苟已  
但吾子安得停行行將復去長存非所營

長歌行

遊矣經天日悲哉帶地川寸陰無停晷尺波豈徒旋年  
往迅勁矢時來亮急弦遠期鮮克及盈數固希全零華  
夙夜零體澤坐自捐茲物句難停吾壽安得延俛仰逝  
將過倏忽幾何閒慷慨亦焉訴天道良自然但恨功名  
薄竹帛無所宣迨及歲未暮長歌承我閑

短歌行

直酒高堂悲歌臨觴人壽幾何逝如朝霜時無重至華  
不再陽蘋以春暉蘭以秋芳來日苦短去日苦長今我  
不樂蟋蟀在房樂以會興悲以別章豈曰無感憂為子  
忘我酒既旨我肴既臧短歌有詠長夜無荒

悲哉行

游客芳春林春芳傷客心和風飛清響鮮雲垂薄陰蕙  
草饒淑氣時鳥多好音翩翩鳴鳩羽啾啾倉庚音幽蘭  
盈通谷長秀被高岑女蘿亦有託蔓葛亦有尋傷哉遊  
客士憂思一何深目感隨氣草耳悲詠時禽寤寐多遠  
念緬然若飛沈願託歸風響寄言遺所欽

吳趨行

楚妃且勿歎齊娥且莫謳四坐並清聽聽我歌吳趨吳  
趨自有始請從昌門起昌門何我我飛閣跨通波重櫳  
承游極回軒啓曲阿藹藹慶雲被冷冷祥風過山澤多  
藏育土風清且嘉泰伯導仁風仲雍揚其波穆穆延陵



子灼灼光諸華王迹隕陽九帝功興四遐大皇自富春  
矯手頓世羅邦彥應運興繁若春林葩屬城咸有士具  
邑最為多八族未足侈四姓實名家文德熙淳懿武功  
侔山河禮讓何濟濟流化自滂沱淑美難窮紀商摧為  
此歌

塘上行

江離生幽渚微芳不足宣被蒙風雲會移居華池邊發  
藻玉臺下垂影滄浪泉沾潤既已漉結根與且堅四節  
逝不處華繁難久鮮淑氣與時殞餘芳隨風捐天道有  
遷易人理無常全男懼智傾愚女愛衰避妍不惜微軀  
退但懼蒼蠅前願君廣末光照妾薄暮年

東晉

東門行

張駿

勾芒御春正衡紀運玉瓊明庶起祥風和氣翕來征慶  
雲蔭八極甘雨潤四垓昊天降靈澤朝日耀華精嘉苗  
布原野百卉敷時榮鳩鵲與鶯黃聞闕相和鳴芙蓉覆  
靈沼香花揚芳馨春遊誠可樂感此白日傾休否有終  
極落葉思本莖臨川悲逝者節變動中情

鞠歌行

謝靈運

德不孤兮必有鄰唱和之契冥相因譬如虬虎兮來風  
雲亦如形聲影響陳心歡賞兮歲易淪隱玉藏彩疇識  
真淑牙顯夷吾親郢既沒匠寢斤覽古籍信伊人求言  
知己感良辰

日出東南隅行

栢梁冠南山桂宮耀北泉晨風拂瞻曉朝日照闈軒美  
人卧屏席懷蘭秀瑤璠皎潔秋松氣淑德春景暄



入骨燕歌行  
孟冬初寒節氣成悲風入閨霜依庭秋蟬噪柳燕棲楹  
念君行役怨邊城君何崎嶇久徂征豈無膏沐感鶴鳴  
對君不樂淚沾纓闥開幌弄奉箏調絃促柱多哀聲  
遙夜明明鑑帷屏誰知河漢清且清展轉想服悲明星  
新楊柳行二首  
鬱鬱河邊樹青青野田草合我故鄉客將適萬里道  
妻妾牽衣袂枝淚沾懷抱還附幼童子願託兄與嫂辭  
訣未及終嚴駕一何早負竿引文舟飢渴常不飽誰令  
爾貧賤咨嗟何所道  
騷屑出穴風揮霍見日雲颼颼無文搖皎皎幾時潔未  
覺泮春冰已復謝秋節空對尺素遷獨視寸陰滅香桑  
未易繫秦茅難重拔桑葚迭生運語默寄前招

悲哉行

羈人感淑節緣感欲回沈我行詎幾時華實驟舒結覩  
實情有悲瞻華意無悅覽物懷同志如何復乖別翩翩  
翔禽羅關關鳴鳥列翔禽常疇偶所嘆獨乖絕

會銓行

六引緩清唱三調佇繁音列筵皆靜寂咸共聆會銓會  
吟自有初請從文命敷敷績壺異始刊木至江記列宿  
炳天文負海橫地理連峯競千仞背流各百里澆地既  
粳稻輕雲暖松杞兩京愧佳麗三都豈能似層臺持中  
天高墉積崇雉飛燕躍廣途鷓首戲清泚肆呈窈窕容  
路曜嫵娟子自來彌世代賢達不可紀勾踐善廢興越  
叟識行止范蠡出江湖梅福入城市東方就旅逸梁鴻  
去桑梓牽綴書土風蘄彈意未已



燕歌行

謝惠連

四時推遷迅不停三秋蕭瑟葉解輕飛霜被野鴈南征  
念君客遊羈思盈何為淹留無歸聲愛而不見傷心情  
朝日潛輝華燈明林鵲同栖渚鳩并接翮偶羽依蓬瀛  
仇依依類相和鳴余獨何為志無成憂緣物感淚沾纓

鞠歌行

翔馳騎伯樂不舉誰能知南荆璧萬金貨卞和不斷與  
石離年難留時易隕厲志莫賞徒勞疲沮齊音溺趙吹  
匠石善運郢不危古絲眇理參差單心慷慨變淚垂

塘上行

芳萱秀陵阿菲質不足營幸有忘憂用移根託君庭垂  
穎臨清池擢彩仰華甍露渥雲雨潤歲蕤吐芳馨願君  
春傾葉留景惠餘明

從軍行

顏延年

若哉遠征人畢力幹時艱秦初略揚越漢世崇陰山地  
廣旁無界岳阿上虧天嶠霧下高鳥冰沙固流川秋飈  
冬末至春液夏不消閩烽指荆吳胡埃屬幽燕橫海咸  
飛驟絕漠皆控弦馳檄發章表軍書交塞邊接鏑赴陣  
首卷甲起行前羽驛馳無絕旌旗晝夜懸卧伺金祈響  
起候亭燧煙迭矣遠征人惜哉私自憐

出自薊北門行

鮑明遠

羽檄起邊亭烽火入咸陽徵騎屯廣武分兵救朔方嚴  
秋筋竿勁虜陣精且彊天子按劍怒使者遙相望鴈行  
緣石徑魚貫度飛梁簫鼓流漢思旌甲被胡霜疾風衝  
塞起沙礫自飄揚馬毛縮如蝟角弓不可張時危見臣  
節世亂識忠良投軀報明主身死為國殤



東武吟行

主人且勿誼賤子歌一言僕本寒鄉士出身蒙漢恩始  
隨張校尉古募到河源後逐李輕車追虜窮寒垣密塗  
巨萬里寧歲猶七奔肌力盡鞍甲心思歷涼温將軍既  
下世部曲一罕存時事一朝異孤績誰復論少壯辭家  
去窮老還入門腰鎌刈葵藿倚杖收雞犬昔如講上鷹  
今似檻中猿徒結千載恨空負百年怨棄昔思君握疲  
馬戀君軒願垂晉主惠不愧田子魂

結客少年場行

驄馬金絡頭錦帶佩吳鉤失意杯酒閒白刃起相讎追  
兵一日至負劍遠行遊去鄉三十載復得還舊位升高  
臨四關表裏望皇州九塗平若水雙闕似雲浮扶宮羅  
將相夾道列王侯日中市朝滿車馬若川流擊鐘陳鼎

食方駕自相求今我獨何為培苦塹感懷百憂

東門行

傷禽惡弦驚倦客惡離聲離聲斷客情賓御皆涕零涕  
零心斷絕將去復還訣一息不相知何況異鄉別遙遙  
征駕遠杳杳落日晚居人掩閨卧行子夜中飯野風吹  
秋木行子心腸斷食梅常苦酸衣葛常苦寒絲竹徒滿  
坐憂人不解顏長歌欲自慰彌起長恨端

苦熱行

赤坂橫西阻火山赫南威身熱頭且痛烏憤魂來歸湯  
泉發雲潭焦煙起石圻日月有恒昏雨露未常晞丹蛇  
踰百尺玄蜂盈十圍含沙射流影吹蠱痛行暉障氣晝  
熏體音露夜沾衣饑猿莫下食晨禽不敢飛毒涇尚  
多死渡瀘寧具肥生軀蹈死地昌志登禍機戈船榮既



薄伏波賞亦微爵輕君尚惜士重安可希

放歌行

蓼蟲避葵董習苦不言非小人自齷齪安知曠士懷雞  
鳴洛城裏禁門平日開冠蓋縱橫至車騎四方來素帶  
曳長飈華纓結遠埃日中安能止鍾鳴猶未歸夷世不  
可逢賢君信愛才明慮自天斷不受外嫌猜一言分珪  
爵片善辭草萊豈伊白璧賜將起黃金臺今君有何疾  
臨路獨遲回

升天行

家世宅關輔勝帶官王城備聞十帝事委曲兩都情倦  
長物興衰驟覩俗屯平翩翩類迴掌恍惚似朝榮窮塗  
悔短計晚志重長生從師入遠岳結友事仙靈五圖發  
金記九籥隱丹經風餐委松宿雲卧恣天行冠霞登綵

閣解玉飲椒庭暫游越萬里近別數千齡鳳臺無還駕  
簫管有遺聲何時與爾曹啄腐共吞腥

煌煌京洛行

鳳樓十二重四戶八綺窓繡栊金蓮花桂樹玉盤龍珠  
簾無隔路羅幌不勝風寶帳三千所為爾一朝容揚芬  
紫煙上垂綵綠雲中春吹回白日霜歌落塞鴻但懼秋  
塵起盛愛逐衰蓬坐視青苔滿卧對錦筵空琴瑟縱橫  
散舞衣不復縫古來兵歇薄君意良獨濃唯見雙黃鵠  
千里一相從

君子有所思行

西上登雀臺東下望雲闕層關肅天居馳道直如髮綉  
薨結飛霞璇題納明月築山擬蓬壺穿池類溟渤選色  
徧齊代徵聲匝邛越陳鍾陪又宴笙歌待明發年貌不



可留身意會盈歇蟻壤漏山河絲淚毀金骨器惡含滿  
歌物忌厚生沒智裁衆多士服理辨昭晰

鳴鴈行

離離鳴鴈鳴正旦齊行命侶入雲漢中夜相失群離亂  
留連徘徊不忍散憔悴容儀君不知辛若霜雪亦何為  
相逢狹路閒行

孔欣

相逢狹路閒道狹正踟躕如何不群士行吟戲路衢  
較步相與言君行欲焉如淳朴久已凋榮利迭相驅  
流落尚風波人情多遷渝勢集堂必滿運去庭亦虛  
競趨管不暇誰肯眷桑樞無為肆獨往只將困淪胥  
未若及初九勢手歸田廬躬耕東山畔樂道詠玄書  
狹路安足遊方外可寄娛

長安有狹邪行

荀昶

朝發邯鄲邑暮宿井陘閒井陘一何狹車馬不得旋  
避迺相逢值崎嶇交一言一言不容多伏軾問君家  
君家誠易知易知復易博南面平原居北趣相如閣  
飛樓臨夕都通門枕華郭入門無所見但見雙松鶴  
栖鶴數十雙鴛鴦群相追大兄珥金璫中兄振纓綉  
伏臘一來歸鄰里生光輝小弟無所為鬪雞東陌  
逵大婦織紈綺中婦縫羅衣小婦無所作挾瑟弄  
音徽丈人且却坐梁塵將欲飛

怨詩行

釋孝休

明月照高樓含君千里光卷中情思滿斷絕孤妾腸  
悲風盪帷帳瑤翠坐自傷妾心依天末思與浮雲長  
嘯歌視秋草幽葉豈再揚暮蘭不待歲離華能幾芳  
願作張女引流悲繞君堂君堂嚴且秘絕調徒飛揚



齊

蒲坂行

陸韓卿

江南風已春河閒柳已把鴈返無南書寸心何由寫流  
泊祁連山飄飄高闕下

邯鄲行

趙女擗鳴琴邯鄲紛躡步長袖曳三街兼金輕一顧有  
羨獨臨風佳人在遐路相思欲褰袿叢臺日已暮

望城行

王融

金城十二重雲氣出表裏萬戶如不殊千門反相似車  
馬若飛龍長衢無極已簫鼓相逢迎信哉佳城市

梁

長安有狹邪行

武帝

洛陽有曲陌曲曲不通驛忽遇一少童扶轡問君宅我

宅邯鄲右易憶復可知大息組網緼中息佩陸離小息  
尚青綺總角遊南皮三息俱入門家臣拜門垂三息俱  
升堂旨酒盈千卮三息俱入戶戶內有光儀大婦理金  
翠中婦事玉觴小婦獨閑暇調笙遊曲池文人少裴回  
鳳吹方參差

新城安樂宮行

簡文帝

遙看雲霧中刻楠映丹紅珠簾通晚日金華拂夜風欲  
知歌管處來過安樂宮

鴈門太守行

輕霜中夜下黃葉遠辭枝寒苦春難覺邊城秋易知風  
急旌旗斷塗長鎧馬疲少解孫吳法家本幽并兒非關  
買鴈肉徒勞皇甫規

從軍行 元帝



寶劍飾龍淵長虹畫彩船山虛和鏡管水淨寫樓船連  
雞隨火度燧象帶烽然洞庭晚風急瀟湘夜月圓荀令  
多文藻臨戎賦雅篇  
相逢狹路聞行迹昭明太子靈靈歎心傷  
京華有曲巷曲曲不通輿道逢一俠客緣路問君居君  
居在城北可尋復易知朱門聞皓壁刻楠映晨離階植  
若華草光影逐颺移輕憶委四屋蘭膏然百枝長子飾  
青紫中子任以貲小子始總角方作啼弄兒三子俱入  
門赫奕盛羽儀華駟服衡轡白玉鏤鞵羈容止同規矩  
宿從盡恭卑雅鄭時聞作孤竹年參差雲飛離水宿弄  
吭滿青池懽樂無終極流日豈知疲門下非毛遂坐上  
盡英竒大婦成貝錦中婦飾粉絕小婦獨無事理曲步  
簪華丈人暫從倚行使流風吹

隴西行

庾慎之

借問隴西行何當驅馬征草合前迷路雲濃後暗城寄  
語幽閨妾羅袖勿空榮

長安有狹邪行

長安曲陌坂曲曲不容憶路逢雙綺襦問君居近遠我  
居臨御溝可識不可求長子登麟閣次子侍龍樓少子  
無高位聊從金馬遊三子俱來下左右若川流三子俱  
來入高軒映彩旒三子俱來宴玉柱擊清甌大婦褰雲  
裘中婦卷羅幃少婦多妖艷花鈿繫石榴夫君且安坐  
歡娛方未周

燕歌行

蕭子顯

風光遲舞出青蘋蘭條翠鳥鳴發春洛陽梨花落如雪  
河邊細草細如茵桐生井底葉交枝今看無端雙鸞離



五重飛樓入河漢九華閣道暗清池遙看白馬津上吏  
傳道黃龍征戍兒明月金光徒照妾浮雲玉葉君不知  
思君昔去柳依依至今八月避暑歸明珠蠶繭登勉機  
鬱金香鴨特香衣洛陽城頭雞欲曙丞相府中烏未飛  
夜夢征天縫孤貉私憐織婦裁錦緋吳刀鄭錦絡寒閨  
夜被薄芳年海上水中鳧日暮寒夜空城雀

君子行

戴嵩

畫野依德星開鄆對廉水接越稱交讓連樹名君子數  
非唯二夫并階無三止探甑不疑塵正冠還避李寄言  
蘧伯玉無為嗟獨恥

煌煌京洛行

欲知佳麗地為君陳帝京由來稱俠窟爭利復爭名鑄  
銅門外馬刻石水中鯨黑龍過飲渭丹鳳俯臨城群公

邀郭解天子問黃瓊詔幸平陽第騎指伏波營五侯同  
拜爵七貴各垂纓東風飄颻起車塵暗浪生舞見淮南  
法歌聞齊后聲揮金留客坐饌玉待鍾鳴獨有文園客  
偏嗟武騎輕

從軍行

江文通

尊酒送征人踟躕在親宴日暮浮雲滋握手淚如霰悠  
悠清水天嘉魴得所薦而我在萬里結友不相見袖中  
有短書願寄雙飛鷺

結客少年場行

劉孝威

少年本六郡遨遊遍五都插腰同匕首障日錦塗蘇鷲  
羽裝銀鑷犀膠飾象弧近發連雙兔高彎落九烏邊城  
多警急節使滿郊衢居延箭箠盡踈勒并泉枯正蒙都  
護接何由憚險途千金募志少一麾擒骨都勇餘聊蹙



鞠戰罷戲投壺昔為北方將今為南面孤邦君行負弩  
縣令且前驅

武溪深行

劉孝勝

武溪深不測水安舟復輕暫侶莊生釣還滯鄂君行權  
歌爭後發譟鼓逐前征秦上山川險黔中木石并林壑  
秋籟急猿哀夜月明澄源本千仞回峯忽萬縈昭潭讓  
無底大華推削成日落野通氣日極張餘情下流曾不  
濁長邁寂無聲蓋學滄浪水濯足復濯纓

結客少年場行

庾子山

結客少年場春風滿路香歌撩李都尉果擲潘河陽折  
花遙勸酒就水更移牀今年喜夫婿新拜羽林郎定知  
劉碧玉偷嫁汝南王

長安少年行

何仲言

長安美少年羽騎暮連翩玉羈馬腦勒金絡珊瑚鞭陣  
雲橫塞起赤日下城圓追兵待都護烽火望祁連虎落  
夜方寢魚麗曉復前平生不可定空信滄浪天

晨風行

范靜妻沈氏

理檝令舟人停艫息旅薄河津念君劬勞冒風塵臨路  
揮袂淚沾巾颺流勁潤逝若飛山高帆急絕音微留子  
句句獨言歸中心熒熒將依誰風彌葉落未離索神往  
形返情錯漠循帶易緩愁難却心之憂矣頗銷鑠

陳

羅敷行

顧希馮

東隅麗春日南陌採桑時樓中結梳罷提筐候早期風  
輕鶯韻緩霜洒落花遲五馬光長陌千騎絡青絲使君  
待遣信賤妾畏蠶飢



從軍行

張正見

胡兵屯薊北漢將起山西故人輕百戰聊欲定三齊風  
前噴畫角雲上舞飛梯鴈塞秋聲遠龍沙雲路迷燕然  
自可勒函谷詎西泥

後魏

羅敷行

高伯恭

邑中有好女姓秦字羅敷巧笑美回盼髮髮復疑膚脚  
著花文履耳穿明月珠頭作墮馬髻倒枕象牙梳姊姊  
善趨步襜襜曳長裾王侯為之顧駟馬自踟躕

後周

日出東南隅行

襄

曉星西北沒朝日東南隅陽窓臨玉女蓮帳照金鋪鳳  
樓稱獨立絕世良所無鏡懸西龍網枕畫七星圖銀鏤

明光帶金地織成襦調絃大垂手歌曲鳳將雛採桑三  
市路賣酒七條衢道逢五馬客夾轂來相趨將軍多事  
藝夫婿好形模高箱照雲母壯馬飾當顱單衣火浣布  
利劍水精珠自知心所愛仕宦執金吾飛甍彫翡翠繡  
桶畫屠蘇銀燭附彈映雞羽黃金步搖動襜褕兄弟五  
日時來歸高車竟道生光輝名倡兩行堂上起鴛鴦七  
十階前飛少年任狹輕年月珠丸出彈遂難追

燕歌行

初春麗日鶯欲嬌桃花流水沒河橋薔薇花開百重葉  
楊柳拂地散千條隴西將軍號都護樓蘭校尉稱嫖姚  
自從昔別春鶯分經年去不相聞無復漢地長安月  
唯有漠北薊城雲淮南桂中明月影流黃機上織成文  
充國行軍屢築營陽史討虜陷平城城下風多能却車



沙中雪淺距停兵屬國少婦猶年少羽林輕騎散征行  
遙聞陌頭採桑曲猶勝邊地胡笳聲胡笳向暮使人泣  
還使閨中空佇立桃花落木花舒桐生井底寒葉踈試  
為來看上林鴈必有遙寄隴頭書

隋

從軍行

盧思道

朔方烽火照甘泉長安飛將出祁連犀渠王劍良家子  
白馬金羈俠少年平明偃月屯右地薄暮魚麗逐左賢  
谷中石虎經銜箭山上金人曾祭天天涯一去無窮已  
薊門迢遞二千里朝見馬嶺黃沙合夕望龍城陣雲起  
庭中竒樹已堪攀塞外征人殊未還白雲初下天山外  
浮雲直向五原閒關山萬里不可越誰能坐對芳菲月  
流水本自斷人腸堅冰舊來傷馬骨邊庭節物與花異

冬霰秋霜春不歇長風蕭蕭渡水來歸鴈連連映天沒  
從軍行軍行萬里出龍庭單于渭橋今已拜將軍何處  
覓功名

結客少年場行

孔紹安

結客佩吳鉤橫行度隴頭鴈在弓前落雲從陣後浮吳  
師驚燧象燕將警奔牛轉蓬飛不息冰河結未流若使  
三邊定當封萬里侯

從軍行

明餘慶

三邊烽亂驚十萬且橫行風卷常山陣笳喧細柳營劍  
花寒不落弓月曉逾明會取淮南地特作朔方城

豫章行

薛玄卿

江南地遠接閩甌東山英妙屢經遊前瞻疊障千重阻  
却帶驚湍萬里流楓葉朝飛向京洛文魚過夜歷吳州



君行遠度萊萸領妾住長依明月樓樓中愁思不開  
始復臨牕望早春鴛鴦水上薄初合鳴鶻園中花併新  
空憶常時角初處無復前日畫眉人照骨金環誰用許  
見瞻明鏡自生塵蕩子從來好留滯况復關山遠迢遞  
當學織女嫁牽牛莫學姮娥叛夫壻偏訝思考無限極  
欲罷欲忘還復憶願作王母三青鳥飛去飛來傳消息  
豐城雙劍昔曾離經年累月復相隨不畏將軍成又別  
只恐封侯心更移

文翰類選大成卷第九十一



